


**TIFFEN** Color Control Patches  
© The Tiffen Company, 2007



9734733  
2741  
316



靜

軒

集



墨輯靜  
軒集三  
齋

靜軒集卷一

高

送尙書柴莊卿出使安南

柴侯身許國志意何深  
涓昆弟死絕域渥注雙玉麟  
談笑萬里侯劍氣凌青雲  
畏途走康莊異俗猶四鄰  
至元淨遐荒包茅貢來臣  
奈爾三不朝廢置良有因  
鱗介易衣裳島夷主民兵  
威儀不勝用仰輔吾仁君

遺山先生挽詩

蕭寺秋風卷玉荷  
月明人影共婆娑  
誰知別後驪駒曲  
便是先生薤露歌  
野史夜寒蟲蠹簡  
錦機春暖鳳停梭  
祇因前日西州路  
常使羊曇忍淚過

廉平章挽詩

海岳儲精五十秋  
早聞仙馭躡金虬  
梁公獨擅斗南譽

中國社會  
圖書館  
藏

閣

續

復

老范長懷天下憂東閣閉關蒼蘚合西山埋玉白雲稠  
鳳池人物誰優劣合在元龍百尺樓

送李兩山再使安南

往年御節使荒遐風節堂堂眾所誇萬里朱厓鱗介地  
一星銀漢斗牛槎轉輸已息江南郡烽燧還清瘴海涯  
垂囊歸來見天子又攜恩詔撫皇華

梅杖

揀徧西湖萬玉柯春風入手重摩挲較量邛竹能香否  
比並鳩藤奈白何聲破夢寒霜滿戶影隨詩瘦月橫波  
只知功到調羹盡不道扶顛力更多

次子方參政劍池韻二首

闔閭千載古墳荒父老猶傳好劍王埋向古池終涌去  
斫開頑石是誰將一峰鼇冠居平地千仞龍刊出大洋  
咫尺蒼厓祕雷雨不愁枯旱救炎方

晴煙漠漠接邱荒萬里春風屬帝王吳主裂雲分峭壁

秦人勒馬問干將樹根絡石懸敲岸泉脈穿厓入大洋

可是高明題品後一泓秋水啟迷方

元詩選  
癸之乙

題干越亭送君石祕校詩後

南昌一尉老西都文采風流接聖俞詩好見稱歐永叔  
書工不減蔡君謨洞庭鴈過風生鞏干越峰青斗戛湖  
細讀粉箋當日詠終篇無字不驪珠

宛陵集

... 惟我太祖聖武皇帝世祖聖德神功文武皇帝規模宏遠預建儲嗣式與古合朕恪遵祖宗成憲允協昆弟僉

# 靜軒集卷一

加封五嶽四瀆四海詔

至元二年二月

未盡全錄再三錄

朕惟名山大川國之秩祀今嶽瀆四海皆在封宇之內  
民物阜康時惟神休而封號未加無以昭答靈貺可加  
上東嶽為天齊大生仁聖帝南嶽司天大化昭聖帝西  
嶽金天大利順聖帝北嶽安天大貞玄聖帝中嶽中天  
大甯宗聖帝加封江瀆為廣源順濟王河瀆靈源弘濟  
王淮瀆長源溥濟王濟瀆清源善濟王東海廣德靈會  
王南海廣利靈孚王西海廣潤靈通王北海廣澤靈祐  
王仍各遣官詣祠致告以稱朕敬恭神明之意文類卷九  
建儲詔大德九年六月  
惟我太祖聖武皇帝世祖聖德神功文武皇帝規模宏  
遠預建儲嗣式與古合朕恪遵祖宗成憲允協昆弟僉

言立嫡子德壽爲皇太子茲有日矣比者遠近宗親復以爲請又中書百司及諸老臣請授冊寶昭示中外朕俯從眾願於今月五日授以皇太子寶所有冊禮其如常制屬茲盛舉宣布新恩於戲慶衍無疆既正名於國本仁同一視尙均福於黎元

文類九

卽位詔

大德十一年五月

昔我太祖皇帝以武功定天下世祖皇帝以文德洽海內列聖相承丕衍無疆之祚朕自先朝肅將天威撫軍朔方殆將十年親御甲冑力戰卻敵者屢矣方諸蕃內附邊事以甯邊聞宮車晏駕迺有宗室諸王貴戚元勳相與定策於和林咸以朕爲太祖曾孫之嫡裕皇正派之傳以功以賢宜膺大寶朕謙讓未遑至於再三還至上都宗親大臣復請於朕閒者姦臣乘隙謀爲不軌賴祖宗之靈母弟愛育黎拔力八達稟命太后舉行天罰

內難旣平神器不可久虛宗祧不可乏祀合辭勸進誠意益堅朕勉徇輿情於五月二十一日卽皇帝位任大守重若涉淵冰屬嗣服之云初其與民而更始於戲不承不顯敢忘持守之心于蕃于宣勉效忠勤之力共毗

新政聿底隆平

文類九

皇太子冊文

皇帝若曰祖宗聖緒恭承丕顯之謨兄弟懿親宜正元

良之號立天下之大本示天下以至公咨爾皇太子

仁廟御德器淵深英姿玉粹武奮清宮之偉績文參定策之

殊勳豈特華萼交輝之情式相好矣其在鳧鷖守成之

治須爾贊之故於連氣同枝之閒付以監國撫軍之任

茲上承於母意蓋允出於朕心已於六月朔旦面授爾

皇太子金寶今復遣攝太尉丞相塔思不花持節授爾

玉冊維寵命之薦膺尙謙恭而自牧益盡甯親之孝益

勤事上之忠以敦九族內睦之風以衍億祀無疆之慶

文類卷十

加封孔子制

大德十一年九月

蓋聞先孔子而聖者非孔子無以明後孔子而聖者非孔子無以法所謂祖述堯舜憲章文武儀範百王師表萬世者也朕纂承丕緒敬仰休風循治古之良規舉追封之盛典加號大成至聖文宣王遣使闕里祀以太牢於戲父子之親君臣之義永惟聖教之尊天地之大日月之明奚馨名言之妙尚資神化祚我皇元

文類十一

追封伯夷叔齊制

蓋聞古者伯夷叔齊逃孤竹之封甘首陽之餓讓爵以明長幼之序諫伐以嚴君臣之分可謂行義以達道殺身以成仁者昔居北海之濱遺廟東山之上休光垂乎千載餘澤被於一方永懷孤峻之風庸示褒崇之典於

戲去宗國而辭周粟曾是列爵之可縻揚義烈以激清

塵期於世教之有補可追封伯夷為昭義清惠公叔齊

崇讓仁惠公

文類十一

丞相伯顏贈諡制

天下大統不嗜殺則一之聖主功蓋必資於賢者昔在至元之際方隆混一之期有來命世之奇材懋建殊常之偉績故太傅開府儀同三司錄軍國重事伯顏崆峒孕秀列象騰精居政府則不動聲氣措泰山之安秉戎律則純乎仁義猶時雨之降當其聲鶴浦渝盟之罪總龍驤飛渡之師克廣世祖好生之心允獲宋人誠服之意衣冠不改市肆不易恩威普洽於三吳車書以混文軌以同聲教遂覃於百粵逮朕纂承之始益申推戴之誠永懷社稷之宗臣宜侈山河之高爵於戲曹侍中江南之役規摹一何小哉郭汾陽異姓而王崇報斯亦

至矣可贈宣忠佐命開濟功臣太師開府儀同三司追封淮安王諡忠武文類十一

丞相阿朮贈諡制

邊外開邊四達弗庭之域將門出將三持分閹之權緬思百戰之勞宜用九原之賁故光祿大夫中書左丞相兼都元帥贈開府儀同三司太尉追封并國公諡武宣阿朮英才閒世勇略邁倫當先皇大理之征佐乃父雲南之役靖蠻方而平交趾拔襄漢而下江南薦瘴揮戈萬里若衽席之上龍驤飛渡三吳歸掌握之中贊成混一之圖式副元勳之號按禮寺易名之典加王章異等之恩於戲青史屢書諒騰芳之有永黃河如帶尚流慶於無疆可加贈推誠宣力保大功臣太尉開府儀同三司上柱國追封河南郡王諡武定文類十一

丞相線真贈諡制

蕭曹翼漢素非閹閣之家房柱匡唐卒乏鉤衡之嗣眷先朝之碩輔絲累世之芳猷永懷弼亮之賢庸示褒崇之禮太傅錄軍國重事開府儀同三司中書右丞相監修國史完澤之父故光祿大夫中書右丞相宣徽使線真稟靈河嶽著象星辰應明良千載之期萃忠孝一門之慶梯天力競元戎奠鶉首之郊扶日功高奕葉應龍飛之運惟昔中書之草創歷陳治古之宏規位望冠於百僚利澤施於四海躬承世祖肇隆中統之不圖子侍裕皇復贊元貞之初政方倚具瞻之重宜昭先德之華維垣進秩於上台列爵仍疏於大國錫號著勳庸之偉易名申節惠之文殊恩允出於朕心卹典非由於汝請表南宮雲臺之像既彰異渥於宗臣措天下泰山之安抑助貞勤於上宰尚服休命永播英聲可特贈宣忠保德佐理功臣太師開府儀同三司中書右丞相追封秦

益國公諡忠獻

文類十一

丞相和禮霍孫贈諡制

命永徽英靈

北方閒氣實生命世之材黃閣清風蓋出登瀛之選慨  
英靈之已往當卹典之崇頒故光祿大夫中書右丞相  
和理霍孫派接元勳慶鍾全德早躡鼇峰之首誕披雲  
漢之章開闢賢關為司徒而敷五教更張化瑟位豕宰  
以總百官恢揚累世之洪休新美至元之大政掄才如  
崔祐甫之廣潔已有張忠定之剛著績熙朝既闡文明  
之治疏封列國宜居禮義之鄉可贈保德協謀佐理功  
臣太師開府儀同三司追封齊魯國公諡文忠

文類十一

瓶城齋銘

為淮東憲司知事凌德庸作

利慾之兵或隳吾城蹂厲之機或發吾瓶墨其守不若  
修仁義之干櫓金其緘不若駕聖賢之說鈴若然則城  
何懼於脫肩瓶何患乎建瓴哉

文類十七

曲阜孔子廟碑

其曲阜令思煇奉表以聞且以

聖上嗣服之初祇述祖考之成訓興學養士嚴祀先聖  
自曲阜始制詔曰孔子之道垂憲萬世有國家者所當  
崇奉中外聞之咸曰大哉王言拭目太平文明之治粵  
明年元貞改元先聖五十二代孫密州尹治入朝璽書  
錫命中議大夫襲封衍聖公月俸百千秩視四品孔氏  
世爵弗傳者久至是乃復申命有司制考辟雍作廟於  
京師由是四方嚮風崇建廟學惟恐居後闕里祠宇燬  
於金季之亂閣號奎文若大中門闈存者無幾右轄嚴  
公忠濟保魯嘗假清臺頌麻錢佐營繕之費歲戊申始  
復鄆國後寢以寓先聖顏孟十哲像至元丁卯衍聖公  
治尹曲阜主祀事將圖起廢奎文杏壇齋廳黌舍卽其  
舊而新之禮殿則未遑也國初封建宗室畫濟兗單三  
州為魯國大長公主駙馬濟甯王分地置濟甯總管府

屬縣十六曲阜其一也濟甯守臣按檀不華恭承詔旨會府尹僚佐鄉長者謀曰方今聖天子守成尙文此鄉風化之源禮義之所從出爲守臣者敢不對敷休命以廟役爲任首出泉幣萬緡眾翁然助之傭工願力市木於河輦石於山掄材於野采棟榱桶楹礎之屬悉具又得泗水渠堰積石數百石堊稱是露階卸砌成足用焉郡政之暇躬爲督視甄陶鍛冶丹雘髹漆以至工師廩積各有司存經始於大德二年之春屬歲祲中止歲事於五年之秋不期月而告成殿臺重簷亢以層基繚以修廊大成有門七十二賢有廡泗沂二公有位黼坐旣遷更塑鄆國像於後寢締構堅貞規模壯麗大小以楹計者百二十有六賞用以緡計者十萬有畸落成之日遠近助祭者衣冠輻湊眾庶瞻颺千禩祖庭頓還舊觀於是衍聖公治遣其子曲阜令思誠奉表以聞且以廟


碑爲請會選胄子入學擢思誠國子監丞特敕中書賜田五十畝以供粢盛復戶二十八以應灑埽仍下翰林書其事於石臣復承命踧踏旣述興造始末竊惟聖人之道與天地並聖人之祀與天地無極堯舜湯文之君不作而道在洙泗立言垂教推明堯舜湯文致治之由模範百王仁及天下後世願治之主莫不宗之廟貌相望達乎四海聖人之道固無係於祀禮之隆殺夫尊其道而苾其祀蓋治古之恆規王政之所先也洪惟聖元神武造邦天兵傳汴戎事方殷不忘存敬先聖之祀詔求五十一代孫衍聖公元措歸魯哀集奉常禮樂於兵燼之餘燕翼之謀肇於此矣世祖聖德神功文武皇帝仁霑義洽九域混同文物煥然可觀內立國學外置郡邑學官而於先聖之後尤所注意遴選師儒訓迪作成需賢以嗣封爵茲志未究皇上纘而成之故自紹膺景

命以敦化厲俗爲先務至於博施濟眾敷文來遠哀矜  
庶獄惠鮮鰥寡由天縱之聖見於設施皆堯舜湯文之  
舉揆諸聖經之言若合符契用能張皇教本光昭先業  
以致魯國臣民思樂泮水如附靈臺子來之眾至矣哉  
觀文化下必世後仁之效豈特震曜一時實宗社無疆  
之福也銘曰

道之大原實出於天何言哉乃以聖傳傳道維何唐  
虞三代儀範百王萬世永賴聖人之功與天比隆聖人  
之祀垂之無窮皇元肇基撥亂右武天兵趨泮周禮在  
魯烝哉世皇載整乾綱始定終綏遂臣萬方肅肅魯庭  
嗣封有典德音孔昭聖謨丕顯王者之作必世後仁繼  
序不忘成於孝孫適觀厥成是訓是則思樂泮水作廟  
翼翼如矢斯棘如翬斯飛籩豆靜嘉陟降有儀祀事孔  
嚴世爵以延汎埽有戶桑盛有田聖政聿新希蹤治古

僉曰皇明登三咸五泰山巖巖聖祀縣縣與國無疆於  
萬斯年

文類  
十九





同氣征伐四出無往弗從時諸部未甯每遇武忠警夜寢必安枕寓直於內與語或至達旦魚水之契殆若天授初要兒斤部卒盜吾牧馬武忠共往追之時年十三知其眾寡不敵乃爲出奇從旁夾擊之寇捨所掠而去及戰太赤兀里鋒鏑旣交約畢命勝敵無或退步武忠繫馬於腰蹠而引滿方寸不離故處太祖推其膽勇嘗潰圍於怯列太祖失馬武忠擁與累騎而馳頓止中野會天雨雪張毳裘以翳及旦雪深數尺龍顏弗霑武忠植立通夕足跡宛然不移顛沛造次脫主於難雖古烈士無以加蔑里期之戰風雪迷陣再入敵中求太祖不見急趨輜重則御勒已還臥憩車中聞武忠至曰此天贊我也及得天下君臣之分益密視夫人蔑里乞真不廢邱嫂禮皇子察哈解出鎮西域有旨從武忠受教武忠教以人生經涉險阻必獲善地所過無輕舍止謹白

龍魚服之戒玉音謂皇子曰朕之教汝亦不踰是武忠旣老以病薨太祖悼痛如喪所親初忠定之生方還自蔑里期戰所中涂護視不啻如己子長率父兵襲爵萬夫長國初官制簡古置左右萬失長位諸將之上首以武忠居右東平忠武王居左翊衛辰極猶車之有輪身之有臂電埽荒屯鼇奠九土柱天之力競矣貞憲王月呂魯公器量宏達襟度淵深莫測其際弱歲襲爵統按台部眾世祖皇帝聞其賢驛召赴闕見其風骨龐厚解御服銀貂以貺國朝重天官內膳之選特命領其事侍宴內殿公起行酒詔諸王妃皆執婦道未幾拜御史大夫江南旣下裂土益封功臣後卽以泉州路爲分邑公長臺憲務振宏綱弗親細故興利之臣欲援亡宋舊制併憲司入漕府他日當政者又請以郡府之吏互照憲司檢底公言風憲所以戢姦若是有傷監臨之體其議

乃格公事上遇下一本於誠事有廷辨當雷霆之下辭  
益鯁直天顏爲之霽威至元二十四年宗王乃顏叛東  
鄙世祖躬行天討命公總戎以先之大駕至半道則公  
已退敵僵尸覆野數旬之間三戰三捷獲乃顏以獻詔  
選乘輿駝畜百蹄勞公公謝曰天威所臨猶風偃草臣  
何力之有駕還留公勦絕餘黨執其酋金家奴獻俘於  
朝同惡數人戮之軍前明年乃顏餘燼哈丹禿魯干復  
叛再命公出師兩與敵遇皆敗之追及兩河威乘破竹  
敵眾大衄酋長遁去時已盛冬聲言駐兵俟春方進忽  
倍道兼行過黑龍江徑擣巢穴殺戮殆盡其酋莫知所  
終夷其城郭鎮撫遺黎而還國家承平日久而變生肘  
腋貽九重宵旰之憂公英猷載奮不期月而三叛悉平  
靖亂之勳偉矣詔憫其勞賜內府七寶冠帶以旌之加  
太傅開府儀同三司申命禦邊杭海二十九年加錄軍

國重事知樞密院事宗藩帥鉞一切稟命於公特賜步  
輦入內位望之崇廷臣無出其右三十年今上皇帝以  
皇孫撫軍北邊公爲輔行請授裕考所佩儲闈舊璽詔  
從之鼎湖上仙公奉鑾馭而南宗室諸王畢會上都定  
策之際公起謂皇兄晉王曰宮車遠駕已踰三月神器  
不可久虛宗祧不可乏主疇昔儲闈符璽旣有所歸王  
爲宗盟之長奚俟而弗言王遽曰皇帝踐阼願北面事  
之於是宗親大臣合辭勸進公復坐曰大事已定吾死  
且無憾惟公一言合臣民共戴之誠成先皇付託之意  
扶日之忠至矣上卽位之始進秩太師佩以尙方玉帶  
寶服還鎮北邊元貞元年冬議邊事入朝兩宮賜宴酬  
酢盡歡如家人父子然先是夫人禿忽魯蒙賜侍宴之  
服曰只孫昭異數也命婦獲受此服由公家始自餘奇  
珍祕寶賞賚弗可殫紀還鎮有期不幸邁疾以十一月

十八日薨於賜第之正寢雨木冰者連日春秋五十有四上聞之震悼不已敕有司給喪賻贈有加剝香木爲棺錮以金銀北葬於怯土山之原大德五年春詔贈宣忠同德弼亮功臣依前太師開府儀同三司錄軍國重事御史大夫追封廣平王諡曰貞憲祖妣蔑里乞真妣完顏氏及夫人抄真夫人秃忽魯皆封廣平王夫人抄真先卒秃忽魯今主家事訓迪諸子克成奉先逆繼之美子男三人曰木剌忽曰脫鄰曰秃土哈女三人曰失鄰適太師興元忠憲王完澤之子中書右丞長壽曰不蘭兮適宣政使答失蠻之子泉府少卿不列秃曰班真在室木剌忽年未及冠詔選皇彌甥女八都馬妻之仍襲爵萬夫長復命公之介弟秃赤爲御史大夫九年春有詔爲公植碑通達戴揚丕績事下翰林爲文臣復竊惟伊尹相湯伊陟復稱名臣呂望興周呂伋嗣封大國

載在方冊以爲美談公家歷事累朝奕世載德師垣萃於一門王爵加於異姓其視商周賢佐宜無少讓以之勒景鍾光信史其誰曰不然小臣作銘不獨表異渥於宗臣尙篤子孫忠孝之勸銘曰  
皇元肇基天挺神武祝栗驥龍哮峒嘯虎猛將如雲謀臣如雨矯矯武忠攀鱗附羽草昧經綸疏附禦侮力竭股肱誠殫心膂忠定桓桓勳伐繼樹命佐商周德符伊呂鼇斷立極鷹揚啟土元祚如天忠力可柱顯允貞憲事予世祖綱振烏臺望崇紫府寇起東藩天戈奮舉公在前鋒氣盈一鼓敢以虜憂遺之君父駕至中途公已退虜一戰而勝還師帝所孽熾復然餘勇再賈威乘破竹敗之水滸三叛悉平遺黎按堵天語勞公賞錫繁舞公曰天威如拉朽腐還鎮朔方彈壓虎旅日贊重明龍飛九五乃冠台纏乃執圭瑄公之庇民如室斯宇公之

衛社如棟斯礎方倚長城遽停相杵當(三)盡傷行路悽  
楚褒德賞功恩洽施普績紀金石家聯簪組咨爾後人  
無替成矩泰山如礪黃河如縷爵以永傳焜燿千古類文

三十

駙馬高唐忠獻王碑銘

大德九年秋七月詔諡故駙馬高唐王闊里吉思爲高  
唐忠獻王曾祖阿剌兀思剔吉忽里追封高唐忠武王  
曾祖妣阿里黑爲高唐王妃祖駙馬字要合爲高唐武  
毅王祖妣皇曾祖姑阿刺海別吉爲齊國大長公主父  
駙馬愛不花爲高唐武襄王妣皇姑月烈爲齊國大長  
公主忠獻王前尙皇姊忽答的美實追封齊國大長公  
主繼尙皇女愛失里追封齊國公主從介弟高唐王木  
忽難請也恭承卹典命府屬王元舉狀先世勳德謁銘  
麗牲之碑謹按家傳系出沙陀鴈門節度之後始祖卜

國汪古部人世爲部長亡金塹山爲界以限南北忠武  
王一軍阨其衝太祖聖武皇帝起朔方併吞諸部有國  
西北曰帶陽罕者遣使卓忽難來謂忠武曰天無二日  
帝無二王汝能爲吾右臂朔方不難定也忠武素料太  
祖智勇終成大事決意歸之部眾或有異議忠武不從  
卽遣麾下將禿里必答思齎酒六榼送卓忽難於太祖  
告以帶傷之謀時朔方未有酒醴太祖祭而後飲舉爵  
者三曰是物少則發性多則亂性使還酬以馬二千蹄  
羊二千角上詔忠武異日吾有天下奚汝之報天實監  
之且約同征帶陽會於某地忠武先期而至旣收帶陽  
天兵下中原忠武爲嚮導南出界垣留居鎮守爲疇昔  
異議所害長子不顏昔班死焉武毅尙幼王妃阿里黑  
挈之偕猶子鎮國夜遯至界垣門已閉訴於守者繼垣  
以登逃難雲中太祖聞忠武死悼痛不已戎事方殷未

暇治也雲中既下詔求王妃二子得獲賜卹孤嫠甚渥  
鎮國至封北平王握金印武毅自齟齬太祖攜征西域  
還年七十鎮國已卒繼封北平王尙齊國大長公主仍  
約世婚敦交友之好號按達忽答鎮國之子聶古觥亦  
封北平王尙睿宗皇帝女獨木干公主略地江淮歿於  
戎事詔以興州戶民千計給葬其尸至今隸王府齊國  
大長公主明慧有智略祖宗征伐四出嘗攝留務軍國  
大政率咨稟而後行師出無內顧之憂公主之力居多  
初武毅未有子公主爲進姬侍以廣嗣續鞠育之恩不  
啻己出子男三人長君不花仲武襄王季拙里不花君  
不花尙定宗皇帝長女葉里迷失公主從憲宗皇帝伐  
宋至釣魚山宋人堅壁不下我師環攻宋卒乘壁而詬  
傍有坐而張蓋者以謂弧矢不我及也君不花素善鞭  
箭射之以顛遂拔其壘三子曰囊加觥曰邱鄰察曰安

童邱鄰察尙宗王阿直吉女回鶻公主國朝之制凡宗  
室之女皆稱公主武襄雖貴爲帝壻總戎日多家居日  
少中統初釁起鬪牆敗叛將闊不花於按檀火爾歡獲  
其屬鎮海濟南之役環城當南面寇數出南門禦以勁  
兵輒復內竄以至授首還率所部從大軍伐叛西北敗  
叛王之黨撒里蠻於孔吉烈數日之間會戰凡七俘獲  
甚眾撒里蠻尋復來歸拙里不花鎮雲南而卒子火思  
丹尙宗王卜羅出女竹忽眞公主武襄所尙齊國大長  
公主世祖皇帝季女也生四子長忠獻王次也先海迷  
失早世次阿里八觥耽嗜儒術尙宗王完澤女奴倫公  
主今高唐王尙宗王兀魯觥女葉絲干眞公主早卒再  
尙宗王奈刺不花女阿實禿忽魯公主女三人必札匣  
爲皇兄晉王妃葉里蠻爲宗王按攤不花妃忽都魯爲  
河閒王也木干妃忠獻王生長北方金革之用固其所

長而崇儒重道出於天性興建廟學哀集經史築萬卷堂於私第講明義理陰陽術數靡不經意宗王也不干叛率精騎千餘併行旬日追及之時天盛暑將戰北風大起眾請勿戰王曰盛暑得風天贊我也策馬以進大敗敵軍殺掠殆盡叛王以十餘騎竄是役也王身中三矢一矛斷其髮凱旋詔賞黃金二鎰白金千鎰聖上御極之初特頒金印封高唐王駙馬封王蓋自王家始王以西北未庭請往征之詔初不允請至再三方許之將行誓曰邊塵不清義不旋轡大德改元夏四月與敵遇於伯牙思或謂俟大軍畢至戰未晚也王曰丈夫爲國死敵奚以眾爲於是鼓噪而進大破敵軍殺傷甚眾禽將卒百餘人以獻詔嘉其勇果賜以先皇所御貂裘寶鞍繒錦七百介冑兵器有差二年秋諸王將帥會於邊共籌邊事咸謂往歲敵無冬至之警宜各休兵境上王

曰今秋候騎至者甚寡所謂鷲鳥將擊必匿其形兵備不可弛也眾不以爲然王獨嚴兵以待是冬敵果大至彼眾我寡三戰三卻之王乘勝追奔逐北深入險地後騎莫繼不虞馬傷而仆至陷敵城敵初待以壻禮數欲誘降應對之際皆效忠保節之語又欲妻之以女曰吾不覩皇太后慈顏非聖上面命不敢爲壻卒不能奪其志上憫王陷敵欲遣使理索未得其人王府蓋臣曰阿昔思往在戎陣嘗濟王於險眾推其可用乃遣使敵一見王於稠人中首問兩宮萬安次問嗣子安否語未竟輒爲左右所蔽翼日遣還王竟以不屈而終嗚呼昔忠武以一旅之眾經綸草昧去僞歸真繼以北平父子武襄昆仲披堅執銳畢命邊陲以死勤事至王凡四世矣蓋王平生潛心聖學綱常之分了然於胸中知義重於生故臨難無苟免可謂無忝爾祖矣至於世締國媼奕

葉封王河山帶礪子孫世爵聖朝所以崇德報功斯亦至矣初王之北也世子主安甫脫襁褓以詔其弟木忽難才識英偉授以金印玉帶海東白鶻封高唐王襲爵之後恪守父祖成業撫民御眾境內又安時齊國公主卒已久凡王之珍服秘玩悉令謹厚者掌之以需世子成立又概兄死節及先德闇而弗彰俾元舉走京師列其事以聞光荷封諡之號其孝友敦睦雖儒素承家有不迨焉嗚呼賢哉銘曰

太祖聖武握乾綱風飛雷厲起朔方忠武華胄踵後唐疆界南北司壕隍有國西北各帶陽射日之弧期共張告以偽謀吞厥疆孤忠竟爲寇所戕帝聞其死久盡傷世嫺汝締寵渥彰鎮國金鈕何焯煌武毅繼踵服王章子復尙主歿戎行一門三將迨武襄東殄海寇斧其吭北禦邊釁平閱牆偉哉高唐忠獻王外系演慶疏天潢

帝姬再降惠澤滂尊師重道興郡庠俗衽金革北方強禮義一變齊魯鄉英風勁氣直以剛捐軀報國分所當千載烈日橫秋霜河山誓節奕葉昌文類二

樞密句容武毅王碑

公欽察人其先係武平北折連川按答罕山部族後徙西北絕域有山曰玉理伯里襟帶二河左曰押亦右曰也的里遂定居焉自號欽察其地去中國三萬餘里夏夜極短日暫沒輒出川原平衍草木盛茂土產宜馬富者有馬至萬計俗衽金革勇猛剛烈蓋風土使然公之始祖曲年高祖峻末納曾祖亦納思世爲欽察國王太祖征蔑乞國其主火都奔欽察遣使諭亦納思曰汝奚匿子負箭之麋亟以相還不然禍且及汝亦納思謂使者曰逃鷗之雀警營猶能生之吾願不如草木耶歲丁酉憲宗在潛邸奉命薄伐兵已扣境公之父班都察舉

族迎降從征麥怯思國世祖征大理伐宋渡江率其種百人侍左右以其俗善芻牧俾掌尚方馬畜歲時撞馬湏以進其色清徹號黑馬乳因自其屬曰哈刺赤蓋華言黑也中統初同氣有鬪牆之釁靖亂第功賞銀百兩公年逾弱冠亦以功受銀五千兩班都察卒乃襲父職備宿衛宗室海都粵自先朝畔渙朔方國家根本之地在北詔遣皇子北平王率諸王鎮守之至元十四年諸王脫脫木失烈吉叛北平諸部暨祖宗所建大帳盡爲所掠公請爲國宣力率兵討叛以其年三月敗敵將脫耳赤顏於納蘭不刺邀諸部以還夏四月應昌部族只兒瓦解構亂脫脫木聞之引兵相應中途遇公將會戰禽其偵高者數十騎敵乃引退只兒瓦解勢孤不能振尋卽殄滅夏六月聞敵駐秃兀刺河馳河上追奔逐北三宿而後返秋八月復敗敵於幹歡河獲所掠祖宗

大帳北平部眾悉追還之詔公率欽察驍騎千人從大軍北伐十五年正月追失烈吉過金山禽扎忽解等以獻繼敗寬折等被創力戰獲輜重羊馬甚眾有旨欽察種人或隸諸王或在民編皆命析出隸公部伍於是戶給楮幣二千緡歲賜粟帛擇材堪宿衛者從事輦轂二十三年置欽察親軍都指揮使公以樞密副使攝都指揮使衛之官屬聽以公宗族將吏爲之夏六月海都兵犯金山詔公與大將朵兒朵懷共爲守禦二十四年春東藩諸王乃顏叛陰結其屬也不干勝刺哈於北邊諜者二人至軍中爲公所執盡得其情遣使以聞且言宜召勝刺哈等赴闕一日勝刺哈設宴召公及朵兒朵懷朵兒朵懷將往公止之曰彼包藏禍心吾屬至必被禽大軍誰與統屬遂不往尋有旨令勝刺哈入朝將東道進公言於北安王曰若輩分地在東脫有不

虞是縱虎入山林也乃命從西道進旣而有言也不干  
叛者眾欲先聞於朝然後發兵公言兵貴神速吾盡忠  
於國當臨事制宜若彼果叛兵至可卽屠之否則與約  
而還眾以爲然卽日啟行公爲前鋒疾驅七晝夜渡禿  
兀刺河與也不干戰於孛怯嶺彼大敗俘獲無算也不  
干僅以身免世祖親征乃顏聞也不干敗走遣使諭  
公收其餘黨沿河而下遇叛王也鐵哥軍萬騎擊走之  
獲乃顏羣牧馬畜禽叛王哈兒魯等獻俘行在所悉誅  
之欽察康里之屬自叛所來歸者卽以付公始置哈刺  
魯萬戶府欽察之散處安西諸王部下悉令公統之  
冬十月乃顏餘黨復萌成宗時在儲闈詔命公扈從往  
征之十一月兵至海刺誅叛王兀塔海等降其部曲  
二十五年諸王也只里部眾爲叛王火魯哈孫所掠遣  
使告急公復命從成宗率師往援夏五月與敵戰於兀

魯灰彼軍敗衄也只里部眾盡復師還至哈刺温山聞  
叛王哈丹軼我邊鄙宵濟貴烈河大敗敵軍哈丹脫身  
以竄遼左諸部悉爲我有乃置東路萬戶府鎮守其地  
二十六年春從皇孫晉王征海都夏六月兵抵杭海  
嶺敵先據險我師失地爲敵所薄軍士隨潰公一軍獨  
前鏖戰久之翼衛晉王而出行至信宿聞襲騎在後公  
選精銳爲殿設伏以待之襲騎聞之遂不敢進秋七  
月世祖巡幸北邊褒諭公曰惟昔聖祖肇基失利於王  
罕二三蓋臣同飲班朮河水者至今稱之卿心衛社稷  
馳譽朔南雖死之日猶生之年卿其勉旃還至京師會  
宴羣臣復諭公曰朔方人來海都有言杭海之役使彼  
邊將人人善戰如土土哈吾屬安所措矣凡有功將士  
可令見朕欲面加優賞公言慶賞之典蒙古將士宜先  
之世祖曰卿毋飾讓若輩誠居汝曹之右盍效汝曹力

戰耶明日召諸將士頒賞有差二十八年秋公率哈  
刺赤萬人北獵漢塔海敵眾將入寇知公在邊遂引去  
二十九年秋略地金山虜海都之黨三千餘戶還駐  
和林三十年春有詔進取乞里吉思師次欠河冰行  
數晝夜至其境盡收五部之眾屯兵鎮守之遣使奏功  
進秩龍虎衛上將軍仍給行樞密院印以便文移夏五  
月海都聞公取乞里吉思引兵至欠河復為公所敗禽  
其將孛羅察一歲之間三著雋功成宗即位以邊圉  
事重須公鎮守有旨無預朝會元貞二年秋宗室諸  
王附海都者率眾來歸邊民驚擾往往逃匿山谷公率  
兵直抵金山玉龍罕界饋餉資糧安集眾庶導諸王岳  
尤忽等入朝公為將鷲猛先期制敵應變如神尤善  
激昂士氣臨陣誓師人百其勇至若出司閫鉞入贊機  
樞忠國大計知無不言古之所謂熊羆之士不二心之

臣於公見之

名臣事略三

內秉險衝水誠嚴密益崇對

丞相興元忠憲王碑


宣宗皇帝御製

公祖士薛乘時草昧從太祖起朔方平諸部歲壬辰太  
宗大舉伐金六師趨汴先期命睿宗由陝右進以士薛  
為前鋒取道金房絕漢上流略襄陽方城而北破金卒  
二十萬於陽翟金亡有事於蜀襲武休興元閬利諸州  
拜都元帥辛丑取成都誅宋將陳隆之西蜀以平父線  
真早侍潛邸中統元年天戈北舉捍禦不虞率身先之  
還拜宣徽使四年進中書右丞相時朝制草創登政府  
者多宿儒耆德相與訐謨廟堂皆經國永圖中統三  
年封皇子為燕王領中書省是為裕宗詔選王府僚屬  
聞公之賢即以應選久之署東宮詹事長入籌帷幄出  
掌環衛小心畏慎夙夜在公裕皇甚器重之一日重宴  
宗室指公語眾曰先正有言為人上者當務親善遠惡

善人如完澤豈易得哉 鶴馭上賓仍主東宮衛兵成  
宗以皇孫伐叛北方詔公總治軍旅輔行者凡再 至  
元末姦臣竊弄威福事敗伏辜端揆難其人博選於眾  
無以踰公乃拜中書右丞相登進善良湔除弊法朝政  
煥然一新方權姦之熾分遣使者乘傳諸道以會計為  
名肆為搭克公私騷然公為奏請自中統初積歲逋懸  
一切釋而勿論迄今人賴其利 公承玉几末命參定  
大策內稟皇太后睿謀外合宗親大臣之議居冢宰統  
百官者踰三月古之所謂不動聲氣措天下於泰山之  
安惟公足以當之 成宗纂承夫統首議加上祖考尊  
謚致隆福長樂之養分寶展親大賚四海朝廷之治一  
以倚公 在相位上體淵衷勤卹民隱數下寬大之詔  
散財發粟以鉅萬計宣布皇仁斯亦至矣 大德四年  
加太傅錄軍國重事內秉鈞衡外綜邊務位望益崇股

肱心膂之託益重 天祐皇元宗臣碩輔稟靈河嶽者  
不為不眾若夫忠藎傳家薦履上台績用著於累朝處  
中書十有二考惟公一人當其四罪咸服治底雍熙既  
彰世祖知人之明至於運佐重光元貞載造偃革以宅  
南交睦族以協萬邦拯災救患博施濟眾克廣聖朝安  
民之惠致君唐虞之效昭然在人耳目矣 名臣事略四

凡之惠廷保... 效烈然... 且目矣... 南交... 中書... 不為... 天... 宗...



# 靜軒集卷四

聖典難... 崇禎... 聖... 崇禎... 崇禎...

加號大成詔書碑陰記

大德丁未秋近臣傳旨議加至聖文宣王封號臣復承

乏翰林獲預其議竊謂自古稱夫子者多矣而莫如孟

子孟子曰自有生民以來未有孔子也又曰伯夷聖之

清者也伊尹聖之任者也柳下惠聖之和者也孔子聖

之時者也孔子之謂集大成集大成也者金聲而玉振

之也蓋言孔子集三聖之事為一大成之事猶作樂者

集眾音之小成而為一大成也宜加號奏可璽書錫命

臣復職當具草既已頒示天下矣邇者江南浙西道僉

肅政廉訪事吳舉建言褒封先聖實當今盛典若不騰

芳琬珍曷以昭示罔極於是省臺檄下諸路勒石廟學

噫自木鐸聲沈千八百年有國家者追崇聖號非一至

唐玄宗始進爵爲文宣王宋眞宗加至聖二字是皆議  
出一時雖口微美之稱孰若我朝取孟子之言爲準以  
聖譽聖之深切著明也凡在郡邑長吏祇若朝廷尊師  
重道之意謹庠序之教申之以孝悌忠信興化善口爲  
務豈不口歟至大三年歲次庚戌夏六月丁未朔翰林  
學士承旨榮祿大夫知制誥兼修國史遙授平章政事  
閣復謹述常山真石樂大丸出香金鑿而王遊  
平江路常熟縣重修文廟記  
洙泗發源中國言吳公導一脈而南湔我吳俗變樸陋  
爲文學聖賢之澤後世深矣至元壬辰復監治吳郡朔  
聖過郡庠縫掖雲集周覽殿廡歷年滋久往往廢而弗  
治頗以教風不競爲憂是時聞常熟有楊公麟伯覩廟  
學缺壞樂輸私帑爲崇飾之聖殿賢廡門牆幄座以至  
吳公宋諸儒祠宇繪塑丹雘粲然復新竊爲常熟言公

故里故水號琴川橋名文學薰陶漸漬宜其異於他邑  
傳曰魯無君子者斯焉取斯方春按行屬縣亟欲一往  
觀之尋以疾告遂不果是年冬閒居吳中前令尹孔君  
文貞价公之壻盛琦子應順謁文以誌歲月復聞學舊  
有記先儒文石具在辭不敢當孔君道公之意甚勤復  
亦嘉公用心有過人者不得不爲一言雖然公之作新  
廟學豈直爲觀美哉方今文軌混同皇仁一視疏濬教  
源此其時也吾願居是鄉茲是邑者仰聖賢之遺像誦  
聖賢之格言深求所謂君子小人學道之義爲人上者  
推廣愛人之念以撫其下若慈父之保赤子爲人下者  
祇服易使之訓以奉其上如孝子之事嚴父上下相安  
風恬俗熙庶幾武城絃歌之化復見於茲邑豈直爲觀  
美哉於是作爲歌詩以詔邑人公字祥甫世爲常熟人  
甲子入大學戊辰登進士第仕至揚州觀察推官是役

也糜錢五千緡有畸督工墾與子洎鄉士李敬甫金應澤其辭曰

句吳之墟古維荒遐維此常熟言公之家公登聖門學列四科泐我吳俗洙泗一波縣邑有學歷年孔多墜塗剝落棟宇敬斜彼美楊公好善靡他作而新之亦孔之嘉孔堂巍巍言祠我我有來邑人瞻望咨嗟如聆誨音如彼切瑳學道一言是訓是訛君子愛人刑靡濫加若保赤子維職撫摩小人易使奚俟譴訶如聽父教罔或僭差邑子彬彬樂育菁莪民俗熙熙薰沐泰和昔我來斯忝接使華尚觀厥成贊以詠歌

拓本碑在常熟

定興縣三皇廟記

鴻荒而下三聖人有作伏羲畫八卦成變化行鬼神神農造耒耜教以稼穡蒸民乃粒黃帝鑄五兵立制度文宣以昭貴賤舟車以濟不通口仁天下後世口矣醫家

者流乃謂制九鍼嘗百藥察色辨脈著之於經尸而祝之以爲醫之宗噫醫果可以盡三聖人乎夫民之生天也生其生聖人也寒而衣之飢而食之露而宮室之野而禮樂之生生之道備矣然猶有厲其生者疾也則又爲之醫焉救其瘥扎天殤躋諸仁壽之域三聖人其天年其祀與天地無極可也聖朝自至元以來詔立三皇祠始於京師達乎郡邑著之甲令以爲彝典定興有祠在縣東北隅亡金大安庚午所建前進士張珙文石在焉國初蔡國張公改築於縣治西南河內村距城二十里而近藻薦之儀弗克時舉大德壬寅秋邑主簿劉君弼會邑人王仲義張伯祥李繼明耆老蔡德澤郭口通謀曰三皇氏立人之極功被萬世而陋祠於野瀆神孰甚焉邑址固在盍更諸眾以爲然伐木於山甄甃於郊鳩財僦工亡胥用觀闕殿穹窿像設尊嚴取法遂古十

大醫師配坐侑食翼以修垣敞以闔扉會劉君滿秩後簿許謙繼董其役縣長紐里皆泊尹李從慶尉邦懷寔始終之落成於九年奉牲幣薦誠籩豆薦馨神人以和邑以是年嘉穀告豐物無疵癘父老相與狀其事因杜衡謁文於予予聞定興為保定屬邑密邇京畿朝廷政令朝發而夕至縣政疵美必達於上職司牧者撫字之餘恪遵詔旨聿修三聖人祀示民報本之義賢於土木淫祠遠矣雖然苾芬事神求其所以庇民不若求三聖人庇民之道治崇簡口興化厲俗迨其漓而樸之使百里之內大安田里涵泳聖澤熙熙皞皞如太古之遺民斯無愧於事神矣予既敘作廟梗槩作歌以嗣塊桴土鼓之音俾歌以侑神其辭曰  
陟巢啄蠡世鴻荒首出巍巍古羲皇天苞浮河龍馬驤立天之道陰與陽立地之道柔與剛乃為人生立綱常

誰其繼者農與黃聖德烜耀日月光欲使萬姓躋壽康楮鞭鞭草力口嘗俞跗歧伯參翱翔八十一篇究毫芒疏淪腠理砭膏膏詡祓疫癘祛不祥口口口口甘稻梁孰知皇澤流沛滂易水浩浩燕山蒼闕宮森邃神所藏昔鞠茂草今備嘗儼然端拱垂衣裳春秋牲牢奠椒漿三后在天靈煌煌翊贊无祚垂無疆百世誌祀騰芬薌

拓本  
在定興碑

藥師七佛閣記

天有七曜而四時行地有七澤而九土甯人有七情而善惡生惟金輪氏立教洞貫三才包括萬類所謂藥師七佛象數之妙將無契於是乎按經之所載灑界凡七界居一佛其光明徧照惠澤普及在浮圖法中猶元天之有日星焉百川之有江湖焉故為其屬者奉之惟謹岱宗之陰曰谷山道場巖巒回抱林樹虧蔽蓋雲山之

都會煙霞之堀宅也謹公上人興滯補敝於劫火廢隊之餘疏鑿而泉種藝而園墾堀而田齋庖之眾無慮數百指既殿中央以居大雄法像謂七佛之壇不可不嚴於是闢層崖而閣焉一日上人赴京師杖錫踵門請為是閣作記問諸興造之蹟曰吾因山以為基故不假覆簣而高伐木以為材故不煩市易而足以願力為役故不待馨鼓而集問閣之大小及為役幾何時曰揭檐為三列楹惟五其高九仞有奇經始於至元十七年春落成於今年之秋又問谷山興置始末曰自元魏高僧意師現化之後曰甯曰朗曰崇曰靖凡四傳而寺緣益大竹谿党公文石具在也復謂上人曰惟閣之役若寺之緣既聞命矣敢問谷山之陽自歷劫以來有無上寶閣以蓮峰為楹以蟠岡為礎以雲虹為飛棟以煙霞為浮藻以萬象為灑身眎今所作為何如也上人曰不然吾

聞天地之外復有覆載陰陽之外復有造化故自其大者而觀之須彌一芥子也大千一棗葉也曾何泰山之足云自其細者而觀之大空之一塵恆河之一沙中間自有佛國在仁者無用妄生分別且為我作七佛閣記予曰即如上問答語予為若作記已竟請歸而摹諸石上人曰唯時至元癸未十一月二日也上人漁臺人俗姓蔡氏夙喪父母從瑋師祝髮此寺壯歲游方始參陶山仁公再禮紫蓋暉公卒得法於普照鑑公行業為眾所推錄泰安僧司事凡數十年與當世名士杜徵君仲梁輩從游甚款其好賢樂善蓋有本云翰林集賢侍講學士中順大夫知制誥閣復記蘇州府志松江南山勝地記蘇州府志佛氏說大因緣舉世閒事無非前定出世閒人無不口知事有遠在數百年後而言驗於數百年前得道者慧

眼一照於未來世或興或廢若著蔡於前口符契於後人亦以前知者悟其前定者焉松江府南禪寺爲在城諸禪冠唐元和間船子和尚過口合爪曰此地形勢最勝願來興福時未省其語至宋崇甯有頭陀張氏卽其地而廬焉掘井得羅漢像十有六頗異之後以掩骼賞不受換牒爲僧實名普願而船子願來興福之言始驗顧雖草創數椽歲久若廢祠敗驛歲在紹興得俊公而復興焉請於朝爲寺南渡百餘年寺門終未光顯天兵下江南踰三十年住山如寄驛倥傯不暇顧彼口來住此山樽浮苴漏僅僅完備每出入是門徘徊四顧西則儒老二宮頡頏爭先寺斂然退後若有物壓其首東則牆垣塞路斗絕築底若有物障其目南則斷流如綫過橋民居櫛以隙不通軌若有物橫其臆思欲挈山門而東之規摹定在胸中凡三四年始克就緒舊有大石龜

蹠跚水涘輦致其左背負崇墉若鼇戴山而前并也入門不數步東南築小土山植松其上若虎伏林而旁衛也口水來其西巽風避其南繚以矮牆夾以佳植委蛇曲折漸入禪境見者生歡喜心咸謂布置之巧口未有顏其門者寶公輒以南山福地四字乞書於中書右丞馬公公曰洞天福地乃道家事非禪口本面采賜鉤畫易以勝地二字而船子此地最勝之言又驗夫地不自勝因人而勝向也行卽面口入卽窺室門外曾不容數騎一轉移閒由南而東舉卽見山門由門而入林影陰翳若行詰曲口徑閒才見有寺地雖勝因人而益勝固無怪也獨怪船子和尚距今四百餘年其前後如口其年安知昔之願今之寶非船子身後身耶時大德改元夷則之月望日正奉大夫翰林學士承旨閣復記承直郎前嶧州知州兼管本州諸軍奧魯除松江府判官傅

大有書篆住持中山道寶立江左石

風科集驗名方序

按素問上古聖人之教下也皆謂之虛邪賊風避之有時風者百病之長也其傷人也有淺深內外寒熱之分至其變化以為它病病有萬殊醫之用藥烏可執一而不達其變此集驗名方所由著也國初虛白處士趙公獲是書於荆湖間今湖廣官醫提舉劉君卿得之用以起廢多矣慮其歲久謄寫失真命廬陵左辰叟校讎增定鏤板以行需予敘諸編首予聞公輸之巧不以規矩不能成方圓師曠之聰不以律呂不能正五音況醫者人命所係可無師傳輕用之哉若夫述內經之旨要究病證之根源列聖賢之治法具古今之方論廣記而備言有條而不紊所謂藥疾之司南醫學之鈐鍵歟予非知醫者也獨美君卿刻意茲術務廣先哲仁民濟物之

心於是乎書大德壬寅陽月初吉翰林學士承旨正奉

大夫知制誥兼修國史閣復序宋齋

劉太傅藏春集序

補之至言除而息糟草木之定禁

易曰觀乎天文以察時變觀乎人文以化成天下大哉文乎在天為日月之著明雲漢之昭回星辰之錯綜在人為之綱五常之道禮樂刑政之方典章法度之美文乎文乎章句云乎哉太傅文貞公學參天人思周變通早慕空寂脫棄世務一旦遭際聖主運應風雲契同魚水有若留侯規畫以興漢業召公相宅以營都邑叔孫奉常絲繩以定朝儀陸賈詩書之語賈生仁義之說當雲霾草昧之世天開地闢贊成文明之治其諡曰文不亦宜乎至於裁雲鏤月之章陽春白雪之曲在公乃為餘事公歿後十有四年是集始行於世夫人竇氏暨其子璋及翰林待制王之綱求為敘引晚生愚陋誠不足

知公萬一姑以時論所同然者附諸編末云至元丁亥  
四月初吉翰林學士太中大夫知制誥同修國史閣復

序

本書

謝解散相公世天開辭藻鑑垂光誤中青錢之選名  
芹宮角藝初無黃絹之辭藻鑑垂光誤中青錢之選名  
非情稱感與愧并竊惟辭賦之淵源是乃古詩之糟粕  
荀氏子發明其大槩宋大夫鼓舞乎後塵英華秀發則  
洛陽少年文彩風流則臨邛詞客自茲以往作者寢多  
摛章繪句者往往有之操紙染翰者滔滔皆是若孫綽  
擅聲金之美子雲韜吐鳳之奇二班父子卓冠一時陸  
家兄弟獨步當世莫不振金石鏗鏘之調窮霧縠組麗  
之文大而仁義諷諭之至言細而鳥獸草木之多識禁  
踰侈則有東京西京之作辨時事則有吳都蜀都之編  
或上林以諷其畋遊或甘泉以述其郊祀升堂入室然

未窺孔氏之門牆宣德通情亦庶幾風人之旨趣何此  
源流之降演爲科舉之文一變唐宋尚餘作者之典刑  
再變遼金無復舊家之風骨拘之以聲律之調暢檢之  
以對偶之重輕以窘邊幅爲謹嚴以黏皮骨爲親切描  
題畫影但知一字之工夫抹東塗西不覺六經之破碎  
習非成是以變爲常事馳驟者輒謂之荒唐務雄贍者  
例云乎唱叫雖子建胷中之八斗不得騁其才雖少陵  
筆陣之千軍無以施其勇然有司之獲選亦壯夫所不  
爲何承平歷世而來莫之敢指蓋僥倖一第之外孰知  
其他必待權衡至公之流庶展琴瑟更張之手伏惟提  
學郎中先生儒林冠冕學海宗盟憫斯文重厄於秦灰  
贊東國復修乎泮水甄陶後進殿最於春秋二季之閒  
鑑視前車洗滌平場屋百年之弊俾削拘攣之態庶還  
麗則之風格雖守而必文辭之可觀辭雖尚而亦義理

之為主加程文律度於古今骨格之內取古今氣豔於  
程文規矩之中自非卓爾不羣之才曷其裒然舉首之  
選如復者青衿小子白面書生學淺鮮而不根氣蕨蕪  
而易潤文慚七步才愧八叉僅知弄筆以作文未免尋  
章而摘句五音中度敢論擲地之宮商八表神遊安有  
凌雲之氣象聊作戰蝸之兩角尚慚窺豹之一班鼯鼠  
之窮顧將奈何黔驢之技蓋止此耳豈意不以菲葑之  
下體遽令糠粃以先揚敢不益礪操脩重鞭鄙鈍進而  
不已雄以當前庶取百中之功不負千金之顧銘心鶚  
路謝九秋桂子之風刮眼龍門看三月桃花之浪文類四十

尚書省上梁文

龍蟠虎踞近依天闕之九重鳥革翬飛肇啟文昌之八  
座昭風雲之慶會聳華夏之具瞻麟鳳來游燕雀相賀

欽惟聖朝罄天張宇互地開封混六合以為家攬羣英  
而入穀周卿有六以豕宰統百官唐省分三曰尚書總  
庶務喉舌典樞機之密股肱資輔佐之良惟政事之有  
堂實熙朝之盛典再涓吉地爰築新基輦來落落之奇  
材構出潭潭之仙府左帶鳳池之水右瞻鼇冠之峰聽  
雞有便於趨朝待漏不煩於他所三槐論道端居上相  
之尊一筆為霖廣作蒼生之福允協龜策共舉虹梁博  
采歡謠庸申善頌

拋梁東日出扶桑化景融盡道今年春澤好安排歌酒  
慶年豐

拋梁南解慍風清澍雨甘萬頃黃雲登夏麥千村白雪  
簇春蠶

拋梁西月窟無塵太白低九曲河清蛟蜃遠萬年枝穩  
鳳鸞棲

拋梁北玉牒交歡懷聖德草芳騏驥附龍鱗沙暖鶴鴿攀鳳翼

拋梁上調元上應璿璣象輔德常依紫極垣洗兵更挽銀河浪

拋梁下發政施仁自鰥寡甄陶萬類入洪鈞廕庇八荒開廣廈


伏願上梁之後三辰即序庶政惟和邦畿符鼎足之安輔相協棟隆之吉二十四考体誇中令之賢材萬八千

年共祝天皇之聖壽文類四十七太廟火災告祭祝文

維大德六年歲次壬寅六月癸亥朔十二日甲戌孝曾孫嗣天子臣某謹遣攝太尉中書左丞相臣哈刺哈孫

答刺罕敢昭告於太祖聖武皇帝於穆清廟對越在天便殿火災震驚神御聿懷懼省祗薦苾芬祖考以雷來

格來享文類四十八



# 靜軒集卷五

翰林學士趙公墓志銘

大德七年正月辛亥翰林學士趙公晦叔卒於官其年  
十月中書右丞相入對天子曰趙與票事世祖皇帝迄  
今凡三十年敦確清謹身死家貧無以歸葬敢奏以請  
於是天子命有司賻緡五矛復給舟車傳費將行其子  
孟實等以狀來請銘復往歲直翰林公爲待制其敘遷  
也亦相先後知公尤詳義不得辭方至元十四年間公  
以驛來朝深衣幅巾見世祖於上京冰澄玉瑩詞氣整  
朗言宋亡根本所在親切感動世祖傾屬自是人翰林  
爲待制爲直學士公之爲侍講也言江南箕斂急督移  
括大姓宋世邱隴暴露皆大臣擅易書詔明旨又言庚  
寅歲大霧蔽塞正月甲辰虎來西城其徵爲下臣執權

此處有模糊的印刷文字，但大部分被一個巨大的、不完整的墨迹或圖形所覆蓋。可見的文字包括：...天子...大德...翰林...等字樣，但均難以辨認。

竅政言訖公闔門待罪後翰長司徒公俾同列諭意始  
 復入署公每視職清望近思欲以言議質直理道確近  
 條縷報上故所言常若剴切無隱而世祖沈幾先物神  
 量莫測或為公懼至平章政事不灰木奏公私負歲積  
 帝曰得非指故臣為虎者宜官酬其逋別給廩粟布帛  
 以養由是始知君臣昭合明著如是曾祖伯洙未朝請  
 大夫知南外宗正事祖師雍宋朝議大夫直寶章閣考  
 希聖宋宣教郎史館校勘高祖宗正子英南遷時丞台  
 州黃巖因家焉伯祖師淵與朱文公纂次通鑑綱目凡  
 例微言奧語耳受身履故公所行尤近嘗與魯齋先生  
 許公論伊洛閫域以力行為致知首清簡為高沈默自  
 祕皆東南極弊文以顯道捨是無以議許公深然之至  
 觀公待人愛士恩禮周洽不為疏數翁訛其持家簡泊  
 無復商確計慮非知道者不能也天性孝友自宗正四

世而下力請於朝而復其役贖嫺黨男女為奴而不能  
 歸者凡十七人始登宋辛未進士第為鄂州教授由鄂  
 來京師迄為翰林學士知制誥同修國史積官至嘉議  
 大夫年六十有二其所成就不為甚過而公以榮祿豐  
 遇為可愧不獲老田里為可喟噫公之心如是而已矣  
 初娶夫人舒氏不一歲卒歸橐中裝于婦翁不取今夫  
 人史氏三男子孟實以公為侍講時特官承事郎同知  
 瑞安州事孟賚温州路教授孟貫將以廕入官孫男女  
 七人以大德九年十二月甲申歸葬於黃巖塔山之原  
 子嘗讀大雅文王之詩曰商之孫子侯於周服殷士膚  
 敏裸將於京以知文王之德之盛商士之恪謹温慈篤  
 承天心惟我世祖明德造邦式混區夏內外大小共為  
 帝臣而公陟降左右承賚接錫終始若一至不幸而死  
 今天子復申命而寵綏之則公死猶無死也是宜銘銘

曰天行野中命而謂之曰公天爵無天出景宜論  
祿不斂贏謀不課利我以其拙彼以其智衣敝策驚內  
澡玉雪誦聲清冷鏗出金鐵蹇蹇九關壬人隕魂維帝  
有訓四方於聞之身云亡之德不爽邱環麓茂一息以  
往繫彼之豐維時之通尚詔後人以封以崇文類五  
元故翰林特讀學士國信使郝公墓志銘  
一天下之道有二以仁以得人漢史所謂知人善任使所  
嗜殺人者能一之奚以得人漢史所謂知人善任使所  
以成帝業也洪惟世祖聖德神功文武皇帝之取江南  
其審是道歟我朝肇起朔方奄宅中夏惟靖康餘孽假  
息一隅干戈相尋餘數十年中統建元之初首遣信使  
通好以偃兵息民為務宋人怙險執我行人久之而不  
返始與問罪之師臨軒命將引宋將曹彬不殺為戒其  
一天下之仁灼見於此為將帥者卒能以仁義之師席

卷三吳所過市不易肆三代名將不啻過馬奉使節者  
被執十六年之久卒能完節而歸不辱君命兩漢名臣  
無以尚之嗚呼世祖皇帝知人之明遠追堯舜豈區區  
漢祖所可比隆哉將帥謂誰大丞相伯顏是已奉使謂  
誰故翰林侍讀學士郝公其人也公諱經字伯常系出  
有殷希乙支子封太原郝鄉子孫因土命氏八世祖祚  
自潞徙澤文陵川遂為陵川人祖諱天挺考諱思溫八  
世同居以儒術教授鄉里考歿門人謚曰靜直處士靜  
直公三子公其長也幼不好弄沈厚寡言金季亂離父  
母挈之河南借眾避兵潛匿窟室兵士偵知燎煙於穴  
爨死者百餘人母許亦預其禍公甫九歲暗中索得寒  
道一甌挾齒飲母良久乃蘇其卓異見於童稚若此金  
亡北渡僑寓保定亂後生理狼狽晨給薪水晝理家務  
少隙則執書讀之父母欲成其志假館於鐵佛精舍俾

專業於學坐達旦者凡五年初被郡帥賈侯之知待以賓禮蔡國張公聞其名延之家塾教授諸子蔡國儲書至萬卷付公管鑰恣其搜覽公才識超邁務爲有用之學上泝洙泗下迨伊洛諸書經史子集靡不洞究掇其英華發爲詞章論議視前古慨然以羽翼斯文爲任自是聲名藉甚藩帥交辟皆不屑就時世祖在潛以太弟之貴開府朔庭招集四方賢士講明當世之務歲丙辰公應召而北優被顧問首陳唐虞三代治道以對又條經國遠圖及民間利病凡數十事悉見嘉納歲己未憲宗皇帝大舉伐宋取道巴蜀世祖奉命帥東道兵直趣鄂岳以公從行公乘閒進言王者之師有征無戰巴蜀地險宋人邊圉孔固萬恐鑿輿西邁非萬全之舉也我師未可輕進宜修德以應天心布澤以系民望敦族以固根本警備以防未然蓄銳以養兵力相時而動江左

不足圖也世祖偉其說會立江淮宣撫司授公宣撫副使以先啟行布宣威德招納降附所活不可勝計是歲秋王師渡江圍鄂憲宗皇帝次合州綴於一岩師久無功未幾上仙凶聞至軍中會宋人請和卽命班師明年世祖御極欲柔服宋人以公奉使告登寶位且徵前日請和之議或謂公言宋人譎詐巨信盍以疾辭公曰自南北邁難江淮遺黎弱者被俘略壯者死原野兵連禍結斯亦久矣聖上一視同仁務通兩國之好雖以微軀蹈不測之淵苟能弭兵靖亂活百萬生靈於鋒鏑之下吾學爲有用矣乃授翰林侍讀學士佩金虎符充國信使初鄂渚之役宋將賈似道遣介乞和王師旣還遂以扞城爲己功入拜僞丞相顛制國事宋主仰成而已聞公來聘恐泄句和之議故館於儀真不聽其入公被留旣久上書宋主移文相府開陳古今和戰利病喻以禍

福存亡之理累數十萬言皆不報又數以詭計撼公公曰吾家業儒凡七世矣顧肯虧忠義大節以辱中州士大夫乎佐從數十輩雖被館穀嚴局鋼鐵環兵擊柝如墮狴犴中人人鬱抑殆無生意公厲志堅貞確然如石不可轉也至元十一年大丞相伯顏戈船南下奉辭伐罪宋主懼而歸公始知似道姦謀誤國卽加竄殛十二年公至京師世祖錫宴於路朝慰勞良久公自中途邁疾至是增劇異日車駕幸上都公留治疾以七月乙酉終於所居之正寢春秋五十有二朝廷憫其忠節特授公子采麟奉訓大夫知林州凡從公使宋者賜爵有差噫宋之亡也非若吳皓之昏暴陳叔寶之昏淫以姦臣制主弗體聖朝好生之德拘執行人自啟兵端爾嚮使從公之言講信脩睦則干羽之舞不專美於虞庭宗廟血食微若敖氏之歎矣蓋宋運將終天開皇元混一之

期以至歸版圖於職方納降王於軒陛惜公不及見焉悲夫公在儀真日以著述爲事準通鑑綱目作續後漢書以正史壽之失著春秋周易外傳太極演原古錄通鑑書法玉衡真觀注三子一王雅行人志等書凡數百卷先哲立言垂世多是幽憂困吝中是知天之厄公適所以厚公也夫人淇澳張氏貞靜端淑教子有法後公十年卒三子二早卒采麟今官集賢直學士朝請大夫文章行業克世其家二女適某氏適某氏孫暨尚幼二弟彝字仲常韜晦不仕庸字季常累官奉訓大夫知潁州事公之歿也權厝於保定西郭靜直君墓側大德三年春遷窆於河陽虎頭山之原從吉兆也先事朝請君持淮東道肅政廉訪副使苟宗道所述家傳請銘幽隧復嘗與君同僚義不可辭銘曰公之爲人其於世也如虎山兮蒼蒼河水兮洋洋山之麓兮河之陽有堂其封



是  
 所  
 者  
 假  
 戈  
 船  
 徑  
 以  
 奪  
 公  
 乘  
 小  
 舟  
 還  
 報  
此下世祖  
 駐  
 馬  
 臨  
 江  
 酌  
 公  
 危  
 酒  
 自  
 公  
 昆  
 季  
 始  
 中  
 統  
 都  
 元  
 帥  
 明  
 年  
 伐  
 叛  
 南  
 惡  
 既  
 公  
 或  
 憚  
 其  
 行  
 公  
 曰

不避難

唐  
 來  
 漢  
 延  
 等  
 漑  
 涼  
 無  
 幾  
 計  
 開

王  
 以  
 出  
 納  
 公  
 公  
 將  
 無  
 為  
 王  
 盛  
 德  
 累  
 乎  
 因  
 僕

指  
 數  
 不  
 法  
 王  
 王  
 召  
 公  
 謝  
 曰  
 微  
 公  
 不  
 聞  
 斯  
 言

戶  
 文  
 蔚  
 之  
 喪  
 不  
 赴  
 八  
 年  
 初  
 道  
 刑  
 按  
 察  
 副  
 使  
 丁  
 仲  
 兄  
 右  
 衛  
 千

饒  
 甲  
 於  
 郡  
 至  
 海  
 服  
 代  
 者

乃  
 教

兵  
 部  
 侍

代  
 者

乃  
 教

兵  
 部  
 侍

代  
 者

乃  
 教

兵  
 部  
 侍

怒解曰董文用豈治鷹食者耶  
 京師運過衛晝夜不絕河  
 公以東作方興召老伍伯之屬  
 將誰公將誰公將誰公將誰  
 議沁水入御河昔不通運漕抑  
 大名長蘆人終人公  
 才任風不見空裕皇在數董文用  
 為山北東道提刑  
 及見公

憲繩已欲使行臺受制行省  
 大政公江淮行省  
 廷也若令受制行省則采風所以尊朝  
 右生術而不加  
 公以諸民間右丞所往出民  
 閒則有說矣夫羊者歲日翦其毛  
 聖武皇帝尺朔方以此民此土喜聞  
 民何者董尚書可不食矣者

仁者之言其利溥哉三十二年拜江淮行省參知政事  
公以錢穀事繁臣才不錢穀不上日汪湖重  
地朕以不錢穀不相臣不  
同列畏懾不事上官不公坐省不相與論事無少屈一  
日選嚴酷吏百輩將括民田民間大駭公力止之不臣  
孫不平屬為浮圖法者不公不以不有司  
役民伐木於山天不兩不公不以不  
日參政敢格不詔旨耶公曰役舉不民不堪矣  
以不之不若不詔旨也相臣  
以不狂不少紓日本之役徵發調度不為海外無益  
為多公以謹邊將稱功不中國有不為海外無益

之舉將不以不十五  
年拜御史中丞公曰不承不按察使風  
憲之是非不是時改中書省為尚書省當不者會不  
人不是時改中書省為尚書省當不者會不  
人不是時改中書省為尚書省當不者會不  
色不其人不公為不附已摅摭臺務不於  
百端公不張不之事不因面  
奏公不不聽令沮撓尚書省政將陷於不測不世祖  
慰公公出殿中或者握公之手曰此事在他人則不  
已矣不日不又不奪民田為屯  
田公固執不許不翰林學士承旨權姦既敗朝廷視  
公益重詔公授經詔皇孫曰老人不畏寒不須暄和不時至帳

中仍遣內侍□□公每預宴□□與□貴□同列或□  
賜飲□御榻之上其眷遇之隆漢人無出其右□公□  
□士亨□繼仲兄右衛君之後□□勇大將軍佩金  
虎符侍衛親軍副都指揮使早卒自餘無登仕版者世  
□□□□救諸子入見公自以□荷殊渥報效無所  
□□兒□求恩□□宸□□宮車宴駕□□□□  
□宮□□□□之臣□□公□共推為□□上嗣位  
公□□拔僚屬□□□□展□□餘召□入便殿□□  
□□玉佩環錦衣玉帶之□既而□□□□□□  
□□萬□旦夕奉□詔行<sub>禮</sub>訪□□國朝故事公亦盛  
言先帝虛心納言□□遠□□或至夜分□次三  
部落公乘閒言臣聞□□□□□宮中外臣庶猶眾  
星之拱北辰□不在□□也□□□□天下□□  
士庶□□□□之□□□□宜以□□□□用

慰元元之望□□□駕南轅□□公請修世祖□□  
□□其□加資政大夫□□□□□史公於□前  
代□德元勳世□□□記憶□□□□公□考為多  
大德元年春上章請老詔錫□□萬緡一子便養官鄉  
郡加資德大夫致仕六月戊申以疾薨於正寢享年七  
十有兩諸□輩以八月甲午□□□□□□□□  
□□□公夙有□□歲時□□祖□□高□□如將見  
之事□忠獻公□□事父訓飭子弟嚴而有□與人交  
侃侃和□好賢樂善不啻飢渴臨民蒞眾寬慈為主而  
略於細故至於□大政決大議辭氣憤發雖賁育之勇  
無以□□□□□□朝政有不善□終夕不寐□  
□□□□祖宗□阻艱□□□□□□□□□□□□  
□□□□□□□□□□□□□□□□□□□□□□  
報上詎可偷安苟容以負國家乎前後所遭皆大姦□



大節可觀 聚斂為姦折以正言首虺可撩須席可編讒

者翩翩媒孽帝前維帝念公曲亦保全逸老鑿披純嘖

自天祐善人報施罔愆蘭苗其芽珠玉成淵滹水之

後馬鬣有阡載德貞珉百祀弗刊常山貞石 志卷十九

劉氏先塋碑

輔國上將軍征東行中書省左丞僉書沿江行樞密院

事劉公國寶因友人戶部郎中唐君仲輝持家傳及平

生戰績踵門致謁曰不肖以祖考遺澤奮身戎行歷位

華顯在制得碑先口口論撰先德顯揚於後者不在斯

文乎惟子職居紀述敢請銘諸樂石復辭讓再三以仲

輝之故不得終辭竊惟忠孝臣子之大節也惟公勇於

赴敵盡瘁國事非忠而何立身揚名以顯父母非孝而

何合是二美萃於一門其銘之也固宜乃為敘而銘之

謹按劉氏之先系出女真望族本姓烏古論氏逮至國

朝始改今姓先世塋域在泰州普一路者不知幾昭穆

矣祖仕金季襲世爵為千戶譜牒遺逸名諱行實皆無

所於考父諱德甯國初侍宗王幹成以掾屬從軍久之

益見親用王既畫境青齊得承制封拜以其才堪治郡

遂命副蒙古官合刺温管領益都路軍民公事因而家

焉春秋五十有八以疾卒妣奧里氏渤海人祖官至龍

虎衛上將軍資稟賢明治家有法享年七十而卒子男

四人長曰國秀次曰國才今居遼東次曰國華嘗任山

東淮南行省理問官早卒次曰國傑是謂輔國公國寶

其字也幼讀書長習騎射以門閥從軍攻下口海有功

擢軍馬隊長至元六年王師有事於宋以材勇應選為

管軍千戶襄樊之役分屯萬山堡宋人伺我軍渡江樵

采發兵萬五千人欲擣其虛堡中兵可戰者不滿數百

陣既成列公首出口敵眾因乘之宋人敗走斬首四千

餘級主帥嘉其功賞銀百兩俄奉軍前行中書省檄攝萬戶提兵二千人鈔略荆南歸峽等州深入敵境轉戰數百里俘獲生口萬計師還賞銀百兩復與宋人戰於城下殺掠甚眾賞銀五十兩樊城外藩曰東土城主帥命公取之豎雲梯先登俄中火礮夷其左股裹創力戰遂平其城奏功於朝特降璽書金符加武略將軍襄陽被圍既久城中乏食宋人有矮張都統者潛師運糧以入省檄命公以八十艘邀其歸路宋人製爲輪船數百結棧相連狀若城堡舟師運棧其中一夕順流而走公先獲間者偵知出期中流擊之舉火聲礮我軍繼至鏖戰三十餘里舟中之血沒踝生獲矮張都統樊城來漢水宋人置椿檣水中以成輔車之勢公馭戈船溯流而上斷拔椿檣與宋人戰盡毀樊城南面木柵堙其壕塹進攻外城城上矢石如雨會日暮我軍引退詰旦復

選銳卒坎墉以登拔之未幾樊城亦下是役也公身被數創尋奉詔旨入朝賞銀百兩及內府錦衣弓矢鞍轡再加武德將軍管軍總管渡江之役大軍次郢宋人築黃園城堡以絕要津省檄付公三百人徑往奪其城堡大軍既進郢將趙都統率騎兵襲其後公還擊走之斬首七百餘級行省上其功詔賜金虎符加武節將軍繼取沙洋新城二堡皆宋人阨塞處也師次洋洛渡公先以五十艘退其守兵進攻城堡凡三晝夜乃拔以功賞銀二百五十兩次于家洲宋將孫虎臣萬艘橫江以禦我師公時以選鋒當前大軍既合敵眾潰亂追奔逐北直抵蕪湖以功超受管軍萬戶是後略地江南累功賞銀至千兩維揚之役詔公以五千入立揚子橋堡以扼宋兵往來宋將張都統率數萬人暮夜來寇我師嚴備宋人既失利遲明開門縱兵追擊彼眾大敗自相蹂踐

溝港爲之斷流遂禽張都統有詔褒諭賜名曰霸都蓋國朝驍勇之稱揚州糧援既絕守將李庭芝棄城遁走追襲至泰州斬首千餘級江淮悉平奉詔入朝賞銀千兩及錦衣弓矢鞍轡之屬仍賜璽書金虎符僉書西川行樞密院事未赴有詔統侍衛軍鎮撫北方師還遷鎮國土將軍漢軍都元帥賜以內府錦衣玉帶弓矢鞍轡及寶鈔五千緡復領侍衛軍萬人北至金山屯田和林安集歸化戶民所全活者餘數萬口還加輔國上將軍以海夷未賓再遷征東行中書省左丞駐兵廣陵會福建寇黃華作亂烏合五十餘萬公將二萬人討平之二十一年冬入覲京師會置沿江行樞密院事節制諸道戍兵詔公僉書院事行中書省左丞如故先是公既受西川行院之命聖上憫其勤勞聽子弟一人襲爵遂以先佩虎符傳之猶子漢臣充管軍萬戶公先娶曹氏

早卒今夫人李氏次姜氏次王氏男曰愛先不花李氏所出姪男二人長曰漢英次卽漢臣皆國華之子初公之考妣權厝於益都城南以至元己卯正月己酉日備禮合葬於益都縣東北四十五里麻家營洱河之陽從吉兆也復旣爲公敘述先世事蹟仍以戰多爵賞附諸篇末尙俾來者知劉氏起家有自以爲臣子忠孝之勸云銘曰

劉氏之先派發金源職長千夫世爵相傳聖元龍飛儷景同翻還定安集佐治海藩輔國桓桓實大其家桓桓維何戰功日多犀甲蛇矛一葦汪沱馬革裹尸誓爲伏波載策殊勳金虎煌煌玉帶錦衣爲龍爲光出入將相榮歸故鄉乃卜先塋洱河之陽旁置萬家允協吉兆豐碑有銘以勸忠孝

山左金石志二十一

裕宗文惠明孝皇帝居東宮博訪英賢以備宮僚左右元良文學行義皆天下之選其在衛官府率德望兼隆忠勤素著惟榮祿公爲稱首公諱慶端字正甫姓王氏世爲真定藁城人顯考金吾衛上將軍右副都元帥勳德具見神道碑銘公早孤能自樹立諸兄已襲世爵公被府檄司筦庫非所樂也尋署水軍提領北方有警詔宰相馳驛和林以督餽餉水軍長一人從行冰雪萬里行者憚之公毅然請往事不避難已見筮仕之初中統三年敗齊寇於老鶻口以功拜千夫長佩金符至元八年城大都板幹方新數爲霖雨所墮或議輦石運甓爲固公言車駕巡幸兩都歲以爲常且聖人有金城奚事勞民重興大役遂獻葦城之策詔用公言所省鉅萬計議加遷賞辭焉第引督役者至千夫長詔嘉廉讓賜白金六鎰王師渡江之歲淮安未下師駐新城遣將分戍

清口公爲之副城中卒不滿數百老疾居半宋人偵知載攻具爲必取之計眾寡不敵主將死難寇燬門將入公樹柵以禦之撫劍誓眾曰丈夫捐軀報國此其時矣士皆感激人百其勇先以弱卒列幟城上擊銅爲鉦響震原野颺言援兵至躬率銳卒踰柵禦敵時公丁腫在臂自拔佩刀刃毒裏創力戰敵眾敗衄淮水爲赤繼而連河浮雲羣盜蜂起公復擊走之屢中流矢不卹也以功加武節將軍十四年扈從世祖北征凱旋拜右衛親軍副都指揮使十六年進侍衛軍都指揮使肇建威武營都城之南先是衛兵至京師僑寓民間靡有定居公相近郊隙地起廬舍畫井邑規爲屯田俾安耕鑿謂訓練不可不時爲閱武之堂曰整暇長技不可不習爲蹶張之翼曰神鋒兵甲不可不堅壽爲函矢之局曰犀利資食有倉以足軍儲康濟有局以備醫疾浚渠通漕以

來商賈僦屋取直以佐兵須公廨列肆偏裨部曲諸衛莫不取法軍士歲上番其至如歸初是役之興眾頗憚勞公不以爲疑迄今人賴其利十九年置詹事院以本職兼詹事丞威武歲久豐羨屯峙山積司民政者欲假粟數萬以佐經費事達裕皇有旨問公公曰兵民一也甯有彼此之間卽付之玉音勞公眞宰相器也二十三年冬大會藩鎮諸王公典禁衛一夕世祖遣近侍覘警夜者爲公邏卒所邀近侍告以有旨曰吾屬知有王將軍令孰知其他近侍還報賜禦寒烏貂以旌之二十四年世祖伐叛東方以公宿將練兵特敕將所部以從是時年踰六十遇敵則披堅執銳摧鋒陷陣駐蹕則環車爲壘以備非常東寇旣除大駕狩北邊有旨命公將衛兵而南公引臣子之義復從北征卒與大軍俱還是行也料敵制勝參與機務贊畫之力居多東宮自鶴馭

上賓總率衛兵膺股肱心膂之託在漢將中唯公一人聖上御極之初諸王宗室畢會上都公外總諸部親翊禁籞內進言裕聖皇太后謂神器不可久虛宜促定大策以慰天下之望旣而改東宮爲隆福宮詹事院爲徽政院拜金吾衛上將軍中書右丞行徽政副使兼隆福宮左都威衛使元貞改充進秩資德大夫大德二年加榮祿大夫平章政事僉書樞密院事仍兼徽政副使左都威衛使嘗以疾在告皇太后亟遣醫往治曰活此老所以活蒼生也公卽引年謝事寢疾於牀上遣中使諭旨王指揮篤實人也宣力旣久家無餘財其錫寶券三萬緡爲藥餌之資俟其良愈別降恩旨公竟不起易簣之際戒其子桓曰子荷國恩忝列台司年登八秩宜無所憾第恨不獲效死邊陲歿於牖下汝勉輸忠力無忝爾祖則吾目瞑矣言終而逝實八年十一月二十六日

也公平生事上忠莅官敬總戎有律而以仁信將之出入行陣與同甘苦威武之建也請於東宮俾尚醫一人主藥醫士卒有疾如視子弟更相謂曰吾屬處鄉閭守父兄不如是之至也或至物故則歸骨於家北伐之日卒長偶遺一幣嚴加督責必獲而後已詹事有外府稱貸取息無度公憫其然謀於同列爲立倍稱之法宋氏之亡有葭莩之屬以事拘京城久不獲免公濟以衣食奏請歸之其廣聖朝一視之仁類此至元末姦臣未卽天誅人皆側目公介然未嘗阿意取容特以丹誠衛社結累聖之知若尚方玉枝寶篋珠衣玉帶賞賚優渥諸將莫與爲比公素純儉雖位使相自奉泊如也所居僅庇寒暑服御不事華飾至於賓筵禮士調濟困乏資給宗族婚葬則弗計家之有無其立朝行己大節雖服儒服飽經訓者有不逮焉嗚呼賢哉夫人劉氏李氏齊氏

孟氏燕氏也速真氏子桓李出也廣威將軍襲爵萬夫長同僉徵政院事佩三珠金虎符娶劉氏二女長適承事郎管領管諸路民匠副都總管趙瑜次適萬戶解世隆佩金虎符男孫一女孫三皆尚幼廣威君卜以九年正月十有四日舉公之柩大葬橐城先塋之左持樞密院判官張浹所書行狀謁文以識幽隧復企公盛德有素又感廣威君能盡子職義不可辭乃爲敘而銘之銘曰

太茂維嶽儲精降神篤生王公智勇邁倫禦寇淮壩國爾忘身翊衛天戈載策殊勳肅事儲闈威武有屯將令申嚴廩粟阜殷金革之威實濟以仁運贊重光聿效忠勤克壯其猷尊主庇民趙充國之金城口略周亞夫之細柳令軍馬文淵之志死邊陲張萬福之不阿佞臣茲數公者合而爲一人橐城之阡馬鬣有墳表貞珉以誄

德諒無愧於斯文

常山貞石志十七

大元故鎮國上將軍浙西道吳江長橋都元帥沿海

萬戶甯公神道碑銘

天水氏靖康南驚抗衡中國餘二百年所恃者長江而已天昇聖元混壹南北篤生虎臣衽金革之強通舟楫之利贊成飛渡之功故長橋都元帥甯公其人也公諱玉孟州河陽人曾祖諱淵金盟津渡都巡檢祖諱源敦武校尉河陽屯田提舉司副使考諱泉懷孟勸農副使慈祥愷悌與物無忤鄉里稱善人妣韓氏生公體貌魁梧膂力絕人兒時聚嬉好作戰陣狀年十七以鼓柶之勇為水軍萬戶張侯所知署盟津渡長鄂渚之役大軍駐南陽遣公督漕宿毫軍食以濟明年從世祖皇帝渡江以勞補百夫長中統初定鼎於燕召公充河道官疏浚玉泉河渠至元三年有事襄樊被帥府檄導鄧之七

里河由新野而南以通轉漕圍守襄陽立萬山屯堡攝口府事兼主浮梁津渡教習水戰既口淮安忠武王統大軍而南公以千人導前至白河結浮橋濟師遂拔沙陽十一年冬師次臨江分道以進與宋人合戰江中公將勇士千人以輕舸五十艘徑奪南岸力戰卻敵指揮戰艦分渡諸軍凡三晝夜而畢自壽口黃池口所過浮梁立就兵無留行至彭蠡湖風濤洶湧梁成輒壞者數四公言梁之不成力不至也躬督士卒取瀕江場圃巨石為碇忠武立馬以需其成進及丁家洲宋將夏貴賈似道舳艫蔽江忠武命公列樹四礮擊其中堅舟多覆溺宋兵大潰威乘破竹下蕪湖取姑熟入建鄴幕府上功明年三月拜管軍千戶佩金符建鄴內外橋梁戰艦悉主之又督造巨艦可勝百萬者艦成分二十艘付公守龍灣藩蔽東寇七月真州守將夜來斫營公潛

以巨艦出其後夾擊之殺溺殆盡從拔常州取平江平江之南曰太湖跨越數州自吳江屬嘉興舊有長橋實南北要衝忠武命公完葺腐敗鎮守須其人特以口公時江南甫下反側者眾且具區瀕海羣盜淵藪公密斷諸港汊置輕舸數十上下巡邏以察非常每有竊發隨折其萌華亭澱山諸賊聞皆解散殲其渠魁陶機察曹橫天等八人餘黨不可勝紀又降鹽寇口百併獲妻孥起屋百楹以居戍兵置安樂堂三區以養病卒招集流民四萬五千有畸俾安生業闔境爲之宴然公前後七拜璽書之命由金符管軍千戶遷宣武將軍管軍總管明威將軍鎮守長橋等處總管尋降虎符職任仍舊升昭勇大將軍管軍萬戶未幾就帶已降虎符鎮國上將軍浙西道吳江長橋都元帥口沿海上海戶佩金虎符二十三年公以久事戎行起居蒸溼積勞成病謝事家

居俄奉宸旨從鎮南王征交趾公力疾以行師至安南公當前隊關山治道樹立營柵率身先之淩冒炎瘴痼疾增劇王憫其忠勤表公長子居仁襲職公逸老吳江私第晚節徜徉以自娛樂二子俱登顯仕伏臘奉歡朱紫侍側時人榮之素喜賓客不吝施與寓吳會幾三十年賓禮儒士崇飾縣學營建梵宇威惠洽於一方春秋六十有七考終於所居之正寢實大德六年三月十日也夫人王氏楊氏皆先公卒夫人蕭氏後公五月卒子男五人長卽居仁初授明威將軍沿海上海戶佩金虎符出征瓜哇升昭勇大將軍改佩三珠虎符左軍上萬戶凱旋策勳世祖皇帝賜資優渥成宗皇帝登極加昭毅大將軍沿海上海戶鎮守浙東道慶元等路今上卽位至大元年七月欽授宣命就帶已降虎符升鎮國上將軍廣東道宣慰使都元帥娶中書左丞許文正公孫

女湖州路總管可成之女也次居正從公征交趾累功擢忠翊校尉杭州路管領海船千戶還備宿衛服勞一紀加奉議大夫樞密院斷事官大德十一年授朝列大夫簽行宣政院事娶鄉先生商文嵩之女次居贊娶前建康路獨吉總管之女次元貞從釋氏法次萬奴庶出也女三人長適宋氏次適池州建德縣尹寇居敬次在室男孫九人曰顯祖見膺宣命襲父職也娶宋故相史公之孫女曰聖童娶鄭參政之女曰斗童娶丹縣翼王萬戶之女曰保童佛保眾家奴佛童百家奴拾得女孫四人曾孫男一人光祖嗚呼公自弱齡拔起行陣奔走先後蹈萬仞不測之淵以取封侯視古名將龍驤伏波未足多讓以至賞延於世增光祖考貽慶方來豈偶然哉公薨後四年昭毅君居仁舉公之柩與三夫人合葬河陽先塋之次狀以請銘神路之碑予往年客吳郡公

歲時遺問又嘗肩輿相過傾蓋如平生問年同丙申也感念疇昔義不可辭乃爲敘而銘之

皇元五葉四海混同一葦長江忠武御戎爲王前驅糾糾甯公公起偏裨志略沈雄轉漕河渠習戰艤艦造舟爲梁畢命前鋒奪岸濟師合戰江中斬黃旣下彭蠡阻風碇石浮艘步騎以通四礮丁洲實樹儁功何堅弗摧何銳克攻惟是震澤沃日涵空爰有長橋隱若垂虹喉衿南北襟帶西東其區瀕海盜肆姦兇公鎮四方豪寇潛蹤乃通驛傳乃扼兵衝人灑田里家樂耕農公私絡繹往來憧憧醫疾有堂校學有宮三紀安集民物阜豐敵愾南交矍鑠是翁鳶飛墮瘴柱立標銅逸老吳江有子嗣封曼秀孫支哀榮始終河陽之阡勒堅樹崇洪濤如帶流慶無窮

孟縣金石志

中書參知政事張公先塋碑銘

人門之慶始於積善人子之孝盛於顯親揚名二者風化之原人道之大本也參知政事張公斯立自以襲先世餘澤致位華顯深懼祖德闇而弗彰撫其所以劬躬燾後者將識諸石昭未來裔復猥當授簡辭不獲命謹按國子祭酒劉君敏中所著家傳張氏世爲濟南章邱人縣治東南十里而遠左枕長白右帶繡江鄉曰錦川公家桑梓在焉遠祖有諱汝礪義通者譜亡世次不可考五世祖九思善富名一鄉會亡金普恩官進義校尉四世祖安上處家以孝友聞配喬氏生四子鐸鑑鉉銳銳卽公之曾祖口身務本操行如前人配孫氏生三子長曰侁次曰伸季曰仲是爲公之祖昆弟皆入粟佐軍授進義校尉金季盜熾山東張氏旣饒財爲眾所口口數被剽劫伯氏及於難公之祖僅脫虎口至體無完膚避地他適者久之事定還守邱隴率諸子力田爲業日

葺月累生理復就緒喪亂之餘遂序舉廢乃置家口口桐子師率衿佩就學申以孝悌之義行之旣久禮俗爲之寢復嘗啟首體創痕訓諸子曰吾家素履勤儉猶以羸羨致寇貨可悖而入乎今示汝曹已事之戒終口口約可也長子琮從事河南凡俘獲男女時其配耦悉聽自便其仁厚類此卒年七十有一先娶喬氏二子琮澤繼室李氏三子寶珍瑞公之考澤生長亂離兄口口口幹蠱叢一身絲歷艱苦尤尚節儉獨爲子收書雖罄囊橐無少靳見參政公從師友講習喜曰吾遭世多故自恨廢學兒能耽耆文儒吾復何憂每對書匱燭蕭口口曰聖賢在是敢不加敬其義方迪子可知已至元乙亥八月四日以疾卒春秋六十有六妣齊氏內行純備戚疏無閒言卒以元貞丙申十一月十有二日壽七十有九三子曰澄曰斯和皆不仕季卽參政公幼穎悟過人

日誦數千言及長刻意問學無所務爲無所不窺辟山東提刑按察司掾史時憲司初立憲長陳公慶甫風節矯矯人皆憚其剛嚴公爲屬吏獨被甄獎自是行業日脩聲猷日著擢江南行臺監察御史轉行省員外郎郎中入爲戶部侍郎參議中書省事戶部尙書出僉江浙行省事揚歷中外蔚有名卿才夫夫之目大德改元春應召入參大政初公從事憲府祭酒君之父文瑞先生居濟南先生亦錦川人清操雅望爲鄉里所宗一日見公與之語驚謂公曰吾嘗往來吾鄉覽山川之勝意必有通博雋偉之才出膺昭代重任求之二十年未見其人觀子足以當之先生素慎許可聞者始知異公至是乃以先生之言爲驗故祭酒君爲公紀述先德稱山川靈異之氣蘊蓄融液生夫才與賢也又恆在於積善之家子固以爲確論然公家先世錫羨之祥出於險阻艱

難其善近止一鄉一邑公方佐理明廷勉圖報效利澤加於民貞懃著於國以彰人門積善之慶以盡顯親揚名之道異時封爵賁於九原褒榮及於三代將見錦川之人畫錦名鄉自公始則張公氏餘慶與長白繡江相爲永遠矣銘曰

積善襲慶理有固然如冰斯源涓流成川如木斯根毫末參天張氏在齊世德有傳善富名鄉輸粟助邊氓之蚩蚩甫脫戈鋌乃置鄉塾敦復化原有來佩衿詒口口言有來俘纍曲示保全儉素傳家孝弟力田奕葉其昌奮蹟英躔弗三槐而命相弗高閈而乘軒揚名顯親之謂孝利澤加民之謂賢長白兮嶙嶙繡江兮淪漣口口慶之未涯又將沐餘潤於子孫耶在章邱神神命典平江府報恩萬歲賢首教寺碑神至元壬辰子客吳郡正月聖日游報恩寺南軒薰公大

師迎憩丈室導予登塔周覽殷廬師體貌魁梧儼若梵  
僧問年則與子同庚甲他日肩輿來訪持報恩興替之  
蹟求為寺碑予辭以未暇居數月觸熱復來申命典記  
往返再三辭不獲命遂書其事俾刻諸石按報恩本吳  
通玄寺吳主孫權為乳母陳氏作也隋代陳為吳令孫  
寬所廢唐僧慧頽更築之開元中詔郡國命藍為開元  
寺郡以此寺應詔大順乾帝復燬於兵錢氏有國日即  
故址而新之揭以支剎山報恩舊額報恩之名實本於  
此古塔起於梁僧正慧久墮劫灰元豐重建蘇文忠公  
軾嘗捨銅龜以藏舍利崇寧初賜名萬歲建炎之難鞠  
為煨燼今所存者九成蓋紹興僧金大圓所造寺有釋  
伽文佛示寂像長及數丈弟子環繞擗踊哭泣極形似  
之工土人多呼為臥佛寺近歲信祐敕造傑閣以覆茲  
像且錫今額圖志相傳又有不染塵觀音像唐太和石

經像毀於建炎而復於紹興金石則蕩為冷風矣自吳  
赤烏紀年迄今千有餘歲浙右精藍此為最古舊分文  
殊法華泗洲水陸普賢五院合而為一大做法筵榜曰  
華嚴性海實出芝林石橋諸師手薰公即開山松鑿義  
法孫也皇朝混一之初來主教席以謂寶坊淨域臣子  
祝釐之地不可不嚴於是度材訓工歲緝月累起外山  
門營東西廡中簷法堂上巖塔劫若賓寮若懺室若土  
地祠若華嚴寺祖師殿若僧堂以至井亭浴室狹座法  
器之屬弊者以新缺者以完墜者以舉輪奐以楹計數  
百有畸墾闢以畝計數千有畸工用以緡計數萬有畸  
予既敘寺緣始末且諭以報恩之說曰父子之親人皆  
有之君臣之義人皆有之今師以無礙辨才闡揚妙法  
因權顯實納民於善俾為子者思竭力以報親為臣者  
思盡忠以報國豈非眞報恩耶十篇之義孰外乎是師

曰善哉謹繫以銘其辭曰

佛日西暉慈雲東冒赤烏紀祥通玄斯肇禎明被兵乾

甯陷盜扁去開元迺崇今號塔始蕭梁中嚴佛寶元豐

起廢蘇文可考圯於建炎金圓再造滄海幾塵炎罔幾

燎不壞真如長圓覺照孰主是緣孰明是妙崧秀相傳

維薰克紹載闢堂筵載嚴塔廟彩繪虛空金瑰蓬蘢鶯

表靈蹤龜呈吉兆花雨晝零蓮燈夕耀放迪愚迷闡明

道要何恩不酬何德不報為臣思忠為子思孝是名報

恩允符真誥歷劫光華恢弘象教通議大夫翰林學士

江西浙西道肅政廉訪使閣復撰并書中奉大夫江浙

等處行中書省參知政事新除江南浙西道肅政廉訪

使徐致題蓋至元二十九年八月聖日建刻文編

泰山佛峪寺勅建藥師七佛寶閣化緣疏

青山萬疊表佛峪之精藍碧瓦三簷起藥師之傑閣謹

公和尚揚清瀚海挺秀禪林顧瞻劫火焚蕩之餘允廣

意師經口之志輦石口口役數百人口口骨勞筋凡口口

紀琉璃影裏幻成寶界之三千菡萏口口中踴出雕欄之

十二嘉議大夫禮部尚書劉果贊妙功德作大檀那樂

輸布地之金用口凌雲之觀蛟騰鳳翥竹溪之古篆增

雄虎攫猿拏杜老之怪松動色尚期眾力集此勝緣布

施百錢乃至布施鉅萬許錢普發願心於一切供養七

佛即是供養恆河沙佛口口聖祚於無疆廣種福田同

躋壽域謹疏至元口六年二月日翰林學士嘉議大夫

閣復疏拓本



升侍講學士明年改集賢侍講學士同領會同館事三十三年升翰林學士帝屢召至榻前面諭詔旨具草以進帝稱善二十八年尚書省罷復立中書省帝勵精圖治急於擇相一日召入便殿諭之曰朕欲命卿執政何如復屢謝不足勝任帝謂侍臣曰書生識義理存謙讓是也勿強御史臺改提刑按察司爲肅政廉訪司首命復爲浙西道肅政廉訪使先是姦臣桑哥當國嘗有旨命翰林撰桑哥輔政碑桑哥既敗詔有司陪其碑復等亦坐是免官三十一年成宗卽位以舊臣召入朝賜重錦玉環白金除集賢學士階正議大夫元貞元年上疏言京師宜首建宣聖廟學定用釋奠雅樂從之又言曲阜守冢戶昨有司併入民籍宜復之其後詔賜孔林灑掃二十八戶祀田五千畝皆復之請也三年因星變又上疏言定律令頒封贈增俸給通調內外官且曰古者

刑不上大夫今郡守以徵租受杖非所以厲廉隅江南公田租重宜減以貸貧民後多采用大德元年仍遷翰林學士二年詔賜楮幣萬貫四年帝召至榻前密諭之曰中書庶務繁重左相難其人卿爲朕舉所知復以哈刺哈孫對帝大喜卽遣使召入相之復亦拜翰林學士承旨階正奉大夫十一年春武宗踐祚復首陳三事曰惜名器明賞罰擇人材言皆剴切未幾進階榮祿大夫遙授平章政事餘如故復力辭不許上疏乞骸骨詔從其請給半俸終養時仁宗居東宮賜以重錦俾公卿祖道都門外及卽位遣使召復復以病辭皇慶元年三月卒年七十七諡文康有靜軒集五十卷

翰林學士承旨榮祿大夫遙授平章政事贈光祿大夫大司徒上柱國永國公諡文康閻公神道碑銘 袁桷撰

世祖皇帝應期握圖肇函諸夏文經武緯各當厥職粵

惟東平地接鄒魯時則有嚴忠武公披荆翦蕪扶植儒學作成逢掖卒能敷文帝庭風動八表鄆之得人號稱至盛而閻李徐孟世名以四傑焉自至元至於太德更進迭用誥令典冊則皆閻公所獨擅公諱復字子靜幼入東平府學蜚聲炳著操筆綴詞賦音節和暢融液事理率占爲舉首幼從贈翰林學士康公康大器之太常徐公道隆年長有聞譽不敢以後進待公在翰林最久贊書積几高下輕重擬議精切傳誦以爲楷則其待寮案擇敏秀者自近不滿意者不復強以文墨任滿不調雖請託亦不得以敘遷故事表賤自待制而下分譔公命各爲一通輯其精良融爲一家而別擬以示其屬始仕東平行臺書記御史臺掾至元八年入翰林爲應奉文字進修撰十六年升翰林直學士十九年侍講明年兼集賢侍講學士於時兩院皆領會同館由是自應奉

至侍講皆兼會同二十三年升翰林學士改集賢學士大德元年復除翰林學士四年拜翰林學士承旨而知制誥脩國史皆視其職以進其補外職則僉河北河南道提刑按察司事浙西道肅政廉訪使世祖陟方召公草詔於上都成宗繼崩復召公上都武宗卽位首上疏曰惜名器明賞罰擇人材朝論韙之賜金錦白金以彰其直顧公老矣願致事以歸乃進階榮祿大夫遙授平章政事給半俸以佚其老且命孺李嗣宗特授承直郎同知高唐州以侍養仁宗在東宮時知公歸特遣使賜幣命公卿設祖帳於都門外旣嘗以院屬侍公入議事堂鵠峙山立中外各改容以奉語簡意足不屑屑持辨爭丞相而下皆傾動一日草詔書其語意難以入國語大臣疑之有集賢學士亦出微語公召掾史具紙筆請學士改撰學士大愧卻立會食畢公改爲之而前詔一

字不復用一坐大驚公以文墨自任不肯爲緊要官罷尚書省時世祖召入便殿諭以卿爲執政官何如公謝不能世祖曰知讓誠美事宜勿強成宗擇相召公密問曰左丞相缺孰可任以江浙行省左丞相某對益稱上意其陳於上者大較若是定孔子主祀賜孔林灑掃及祀田皆所建明興國學論廟樂所助爲多而其在憲府以敦本崇化爲先務當大德星變疏十九事皆切中弊壞成宗賜楮錢萬以優寵公受知成宗爲深嘗問其所師承金玉幣器錫賚有加仁宗初政首命召公以疾辭皇慶元年三月某日年七十有七薨其年五月葬於先塋之側公將薨時夢游祠宮有道士迎問公年口占一詩以答覺而言曰吾殆云逝矣世方以公爲重而公不復少留可慨也矣其所爲文號靜軒集內外制集若干卷將傳於世梅由泰定元年得告歸里越明年公之壻

奉直大夫南臺監察御史李嗣宗以書來海濱告曰子職在太史出處大致子侍承知爲詳隧碑未立願登其事於石以貽永遠梅踰踏莫辭謹按閩氏平陽人今居高唐州曾大父衍贈嘉議大夫大司農卿永安郡公諡懿德妣趙氏永安郡夫人祖和叔贈昭文館大學士資善大夫永安郡公諡昭獻妣武氏封永安郡夫人考忠故高唐主簿贈銀青榮祿大夫夫司徒永國公諡惠穆妣牛氏劉氏追封永國夫人娶尹氏趙氏李氏子一嗣慶以廕授奉訓大夫廣平路威州知州未任以疾卒女一孫男二翁安翁壽女適卽御史君也公旣下世婦弟淮東宣慰使李處恭時爲吏部侍郎慨然曰吾甯使閩公終無以易名遂請於朝得贈光祿大夫大司徒上柱國永國公諡文康其姊亦封永國夫人而公三世亦以令典得追贈竝榮猗歟休哉銘曰

泰伯之曾食采於閭因邑為氏慶源涓涓太原之閭顯  
武後唐戰多著名分茅為王有孫曰象決科就文撫綏  
降邦拯其溺焚迢迢裔孫實家平陽試邑死事和川歸  
藏是生惠穆占籍名郡推誠急施樂善不靳教子有行  
俾離其鄉業精行成何求不償顯允文康以文偉著執  
其牛耳莫或敢侮斟酌泰和密勿元氣英露裔雲萬物  
屬鼻鎮於詞垣幾四十年矜彼不能擢才進賢維我世  
祖養茲國珍薦更三宗猶昔舊臣公歸白雲多士盡悼  
凡今日能亦公所造何以遠貽有豐其碑實茂聲宏播  
於銘詩清容集

右靜軒集元閣復撰復字子靖高唐人官至翰林學  
士承旨遙授平章政事乞骸骨卒諡文康事蹟具元  
史本傳復美風儀操筆綴詞賦音節諧鬯融洽事理  
嚴實在東平招諸生肄進士業迎元好問校試其文

預選者四人復為首徐琬李謙孟祺次之時號四傑  
元貞元年復上疏言京師宜首建宣聖廟學又言曲  
阜守冢戶昨有司併入民籍宜復之其後詔賜孔林  
灑掃二十八戶祀田五千畝大德元年加至聖封號  
皆復之請也復在翰林最久以文學自任不肯為執  
政官上亦嘉其謙退宜其文氣春和融粹絕去町畦  
卓然為元一代大宗列傳云著有靜軒集五十卷袁  
桷撰神道碑云又有內外制集若干卷文淵閣書目  
均未著錄明初已佚今從文類及金石碑版共得四  
十三篇不過十分之一訪碑錄尙有高唐州重建廟  
學碑重修東方朔廟碑二通均未見光緒乙未七月  
江陰繆荃孫識



其錫鑿空無端  
 學軒重刻東衣  
 十二餘不與十  
 其味未善繪則  
 淋舞輪前輕淡  
 草然然氣天一  
 凡知官北亦嘉  
 於者更之精也  
 鄭融二米八司  
 單與滾可批育  
 完貞天半對土  
 野異昔四人野

